

Yonna Yesusmoa

Yonmba Ishomnavna

Yesusm, Sesoana Ombolm.

Sesoana Moamba Os Nilhana, Ona Indhanarini.

1 ¹Nemetva doarava manimani pethava nomba mendah lohvnamoa. ²Wo Sesoana moamba os nilhana, ona indhanarini. Wo no indhanariniva himba Sesoi lohohra ahavna. ³Himba doara di ahavna Sesoi, nonamba manimani lohvnamoa. ⁴Manimani henana sovena. Mana vemava indamonamba phonamoa. ⁵Himba undna avna, wo ninda himba undnonoa daswolna indhanamba indkumbimba, snal ovna, woklava lavradaswolv. Nengam osm beswonam novvie. ⁶Wo nomba woklava lavrapisahav sikulmonam. Wo simba owai, es eva hembra pilpikohavav.

Sesoa Yon Baptaism Wolaihaprana.

⁷Doa Sesoa mongom indhanarinim wolaihaprana, nihilva Yon. ⁸Himba prunna, ishunilm indhanam woklamom. Wo henamini indkumbiva woklamomba vravra, eva keknam undnahonam lovahthamnalm Kristusm. ⁹Yonmba himba nomba woklava owai, heva os himba ambo ishunilm prunna indhanam woklamom.

Kristusva Petharamba Prona, Ona Wokla.

¹⁰Hona woklava himba woklanonoa, wo himba honamba petharamba pronamba, indkumbim lovhueinna. ¹¹Himba hona pethara avna, noi ten hev tevenam, wo heva os pethanindva os hembra liheinamoa. ¹²Himba hevna petharam prona henga, wo heva os hevtindiva hembra patvmonanamo, Yutanindva. ¹³Wo heva os monglava hembra patvmonana. Himba keknam undnahonam lovahthamnavna hembra. Wo ninda hembra himba wolawona, alm Sesoana otovotalalm. ¹⁴Himba

nomba suvenamoa nisva araravalna tovolnamba Sesoana otovotalalmba. Nihna nengavnangrava, indhanana nengavnangrava owai. Sesoa hev suvena hevna otovotalalm.

¹⁴Honamba Sesoana moamba nilhana indhanarinielm, wo kamongo himba mongawulm aevulvna. Kava nunglimnivna hena pusambava, osm himba mongasal ombolva Sesoana arana. Hembra wolaihaprana petharam, wo hembra pilivhoawol lohwolv, vei, wavrana eva moanonoana. ¹⁵Doa Yon Baptaisva hemom ishona. Hev vevandnam moakus unnam, hehonam kava yemba doarava ishonna, osva mongova indhanariniva sisva si kamba pethapramnavav. Himba mendekli, henga kamba wohkuvhoav. Himba doara wohavna, kava sismini.

¹⁶Hembra nongapala vev wavrana eva moanonoana. Henaminiangas pimba indkumbiva elsus vrvav esvemava awothowolva. ¹⁷Sesoava doa holothunna lohohmomba pimba Mosesna englisra, heva os wavrana moanonoana provna Yesus Kristusnamini. ¹⁸Indhanariniva doava mongova nonglanamoa Sesoamba. Heva os Sesoana mongal ombol murava av aralindava. Wo ombol novpa wohwuleihinv pimba, osmba Sesoava snal av.

Yon Baptisna Moa, Kava Manalm Lohv.

Matiu 3:1-12, Mak 1:7-8, Luk 3:15-17

¹⁹Wo doa Yutanindna kuwulva Yerusalemriniva wolamb vevna sembayang andranindm eva kokoldombnindm Yoninam, hem sah ovralm, osm, yimba manalm lohv? ²⁰Yonmba wohishovna bambanam, himba komandhanamoa, hembra opla vrinilmba. Hev unna bambanam, kava Kristusva owai.

²¹Wo hev umnina, wo an hevpa eva yimba? Es hevpa yimba Elaitama, a? Hev unna, owai, kava Elaitava owai. Wo henga umnina, wo es hevpa yimba no moashulnindrinima, noi ten piv nengvilivm? Hev unna, owai, kava nomba moashulnindriniva owai. ²²Wo hev umnina, wo yimba manalm lohv? Eva kam ishunuta, osm ata kava os ishunvav, nomba temba himba kamba wolamb veiva. Es yimba oi pevmba? ²³Yon ondoht vivvna Aisaia moashulnindrinina moam,

Kana moalamangva os oi, indhanarini wunuho ov sahalpethara, os vueinghimnu monam beswonam mendeklim. *Aisaia 40:3*

²⁴No Yutanindva, temba hembra wolamb venamba, monglava himba Varisinind. ²⁵Wo hev umnina Yonm, yimba os oima, kava owai Kristusva. Yimba os oima, owai kava Elaitava moashulnindriniva. Yimba os oima, owai kava nomba moashulnindriniva, ten piv nengvilivm? Wo manara eva yimba ponamba poswol vev indhanamba?

²⁶Yon ophona, kava poswol vev indhanamba pona. Wo heva os mongo men yemongo lohvm, heva os owai, yimba liheivmoa hembra. ²⁷Himba

noi, ten sis pethapramnavm kam. Kava mani mendekli indhanarinima, ova kava pelvwol venavra hena wemba spatoriniva. ²⁸Honamba manimani Yonmba di wonovowona Betani kembella, mongnamilm Yotan pora. Di ten Yon poswol vawovnam pona indhanam.

Yesusva Sesoana Sipsip Otolmsna.

²⁹Wo mongnasimba Yonmba nonglanga vena, Yesusva ten prov kaindam. Hev unna, nunglu, sipsip otol Sesoana, he pethanindmba kilumbshuawol vev indkoklariniva. ³⁰Hem honamta, kava hemomba ishovna. Kava os ishovna, indhanariniva si sis kamba pethapramnavav, hevna andram velm. Heva os himba mendklinonova, kamba kuvhoav, manara, himba doara hesna avna, kava os lohna. ³¹Seilva kava hembra lihanamoava, wo os kava pronamba, indkumbim pona poswol vevna, osm pimba Israelnindva si lihevav hembra.

³²⁻³³Yonmba unna, kava lihavnamoava, ova an hevpa Kristusva. Heva os Sesoava kamba wolaihaprana, poswolalm ponam. Wo Sesoava kamba ishomnana, yimba si nonglavav, kavsongolva holaperava, ovhoamnavra indhanarinini-inda. Wo hona indhanariniva Kristus, he si awothowol vevra Sesoasongolnanamba. Doa Yon henga ona, kava nonglana, Sesoasongolva holapevna senamini. Wo nomba Sesoasongolva snal ona, leumb, wo avna nihra Yesusinda. ³⁴Kava nonglana, honamba os vena. Wo kava osoa indhanamba ishuvv, memba himba honamba ombolnonova Sesoana.

Seilmba Miva 4Pelara Saivna Indhanamba

Yesusna Aonghal Mahalnindilmba.

³⁵Wo mongnasiva Yon Baptaisva henga di wonlohvna hevna hellelnindrini samblam. ³⁶Himba wonnonglanga vena, ten Yesusva kohangav, wo unna, nunglu sipsip otolm Sesoanam. ³⁷Wo himba ehellena, ona, Yonmba os ov. Wo himba ehengva wulengavna Yesusmba.

³⁸Wo Yesusva ona haravhoana, nongalna, men kam epawohamnav sis. Wo hev unna, manam yimba eslelv? Hev ohophona, rapai, hi henalhra yimba alohv? (Rapaiva osm uv, guru.)

³⁹Yesus opla vrinna, kam ambo ehengpro, ata yimba di enonglavav. Wo doa no indhanarinini samblava os wohepawohamnana Yesusmba. Wo enonglana, nom deuvm, ten Yesus noinda alohvnam, wo ova nonamba himba di aevulna Yesusmango. Nonamba doa okombava singvel vevna. ⁴⁰No indhanarinini samblava, temba ehengva wulengavnamba Yesusmba, nonamba Yonmba ehellenamba, ona, Yonmba ishomnav Yesusm. No indhanarinini samblava, mongova Endru, himba Simon Pitana boasalal.

⁴¹Wo boasna himba silelguana hevna boasalalmsna Simonm. Hev omnana Simonm, doa kava enonglai Mesaiamba. (Mesaiava osm uv, Kristus, temba Sesoava pusvundthoanamba.) ⁴²Wo doa os Endruva

Simonmba Yesusindamba waingana. Wo Yesusva nonglanamba Simonmba, wo omnana, yimba Simon, Yonna ombol. Yemba henga kava os awov, Sipas. Sipasva osm uv, Pita, memba elhonmsna av.

⁴³Doa mongnasimba nengvna Yesusva, galm Galili provinsram. Himba boasna gana, Pilipm omnana, yeoa kam pethamno. ⁴⁴Pilippa himba Betsaita kembellini lohvna, Endrui Yoni ten elohvnam nomini.

⁴⁵Pilippa nonglanamba Natanielmba, wo omnana, nengo nom, Moses ten novol venam lohohmora, ona, indhanariniva si provav, wo eva moashulnindva hemomba novol vewol vina. Doa kava hembra nunglina. Himba Yesus, Yosepna ombol. Himba Nasaret kembellini.

⁴⁶Wo Natanielva omnana Pilipmba, Nasaretma, wo es hevpa mana vema besal phovrama Nasaretriniva? Pilip ophona, prorava, nonglo. ⁴⁷Yesusva nonglana, Natanielva ten prov kaindam. Hev ona, hona indhanariniva memba Israelnindrininonoa. Moakokomomba owaimomolmba heindava kethalohvmoa.

⁴⁸Wo Nataniel omnana, es hevpa yimba kamba ova lihei? Yesus ophona, kava yemba nonglai, yimba avna fiksingi, Pilippa yemba mendah ishomnimoa kamomba. ⁴⁹Wo Natanielva mengpoavna omnana Yesusmba, guru, yimba Sesoana ombolnonoa. Yimba king kuwul luhunv pina Israelnindnamba.

⁵⁰Yesus omnana Natanielm, yimba undnahonam kamba lohmanav, noinda kava yemba ishomni, os kava yemba nonglai, yimba avna fiksingi. Tanam yimba si mana vemamba mendeklimba nongalvav pevna novna, honamba kuvhoavav. ⁵¹Wo doa hev unna, kava tanam yemba ishunv, yimba si nunglivav, ovpa velaiha endvra. Wo yimba si nungeilvra, Sesoana ovsongolnindva si ahalapiha vevra yimondramsna kaindava, kava arana ombol lohv.

Onganung Vevna Diva Keina Kembellava.

2 ¹Os sambla ninmba vewulnamba, diva onganung vevna Keina kembellava Galili provinsrava. Yesusna avalva di doara kusovna. ²Eva Yesusmba hevtindinahonam doara das owol vina no onganungramba. ³Wainpva hlipianamba, nomba diva novngas viwul vevna, Yesusna aval ombolm omnana, himba wainpolva mongova wuleivvmoa.

⁴Yesus omnana, ava, manam yimba eva kamba omnav, kanamba nambaiva mendah provmoa, mendekliandrava velmba. ⁵Wo avalva ishunvna andranindmba, yeoa nooa wohvinivm, himba temba yemba nomba unvrava, velmba. ⁶Wo no deuvrava blekkumbiva diva indvlohvna 6pelara, osm pom ivsho vewolalm noindam. Yutanindva noinda hevnm poswolalm, osm hevna wevolm engivra. Mendeklikumbi indvlohvna, pomba os lungundy, velohlohvna 100 lita. Honna vewol vina. ⁷Yesus

unna nom andranindm, ivsho vewol viu hona blekra. Wo himba sovhowol vivna, venamba, doa ambo sovhoral vungu vevna.

⁸⁻⁹Doa hev henga unna, wo henga mengellinioa veltharombol vivrava, doa tihna aralm wulangamno. Doa wulangamnanamba, wo hev bes nenamba, doara wainpolalm nilhana. Wo hev tit vena, hinimini vrei? Andranindva nonora lovahvna, temba himba pomba wulanganamba. Wo doa tihna aralva das ovra no angotalaim,

¹⁰wo hev omnana, memba wainpolva besalngas. Indhanana wevsava yimba engivmoa, himba os vewol viv, himba boasna wainpova besal moang vi, wo sismba indhanamba mindnam hlapiarava, himba wainpova sahoklalva moang vi. Heva os yimba owai, yimba doara komandhai besalva wainpova, wo daipota men yimba wulprov.

¹¹Memba Yesus seilnovra vena hevna mendekliandramba, himba di Keina kembella vena Galili provinsra. Di himba hevna pusambakambamba novpa wuleihinna, osm ora keknasowol wohlohv. Wo hevtindiva os hembra undnahonamba keknamba lohvhooapramnana. ¹²Nonamba Yesusva wonsihavnamba Kapaniam kembellamba nomba avalm, towandaslalm, hevtindim hevnam. Wo himba ambo uvsimbaihana diva Kapaniamba.

Yesusva Engalungu Vena Tempelmerini Indhanamba, Nomba Temba Himba Bisnisandrava Vivnamba Diva.

Matu 21:12-13, Mak 11:15-17, Luk 19:45-46

¹³Wo nonamba doa mumra vivvna Yutanindnamba mendekliva tihva Pasovatihva. Wo Yesusva Yerusalemramba gavna. ¹⁴Wo di peilla tempelduvrava himba ona nongalna, indhanamba men esvowolv sapina sipsipna tuawana leumbtuwana. Monglamba nongalna, himba hevna meyara aevluwul vevna, sembayangnindna diva dumbuluhunvna, wo tempelna diva dembrehunvna hembra.

¹⁵Doa Yesusva saong vranamba, nona di esvema vivvna sapina sipsipnam manam manam, wolapho velm. Wo osoa phona, meyam mulgothunnamba, diva nomba opihalohvna petharam, temba among vevnamba esesmba. ¹⁶Wo hev unna, nomba temba leumbtuwava esvowolvnamba, wonpulvo honaoa lelnam honaminioa, hengava manam yimba hulvui iambvav, wo kana arana deuvm maketduvulm vrvim.

¹⁷Hevtindiva nunglinamba, nomba temba himba vivvna hembra, himba henga ningvna, nom ten novol velohvnam Sesoana doaramini tombaimora,

Sesoa, deuvoa yenaao ambo povawinvra indhanam, os kanamba undva suwemsna vuvrev.

Buk Song 69:9

¹⁸Wo Yutanindna kuwul umnina Yesusm, kana novra boasna vintok mendekliandra. Nonglalm, osm ora, yimba lehra tempelduvmba ovuni.

¹⁹Wo Yesus unna, tetga viu hona tempelduvm, kava si henga vevav samblamong okombanam. ²⁰Yutanind opulvona, yimba gekala ov, indhanamba vina 46pelara tahonmba, vinamba hona tempelduvpa. Wo tanam yimba nengvma, osva kava vevav hengava samblamong okombanam?

²¹Heva os tempelmba, Yesusva ambo olhmona olhinva hevna nihm. ²²Sism hev ten phonam pokamarini, hevtindiva ningvna, nomba Yesusva os ona. Wo noinda himba kek vithivna doaramini tombaimomba, eva moam, nom Yesus ten ishovnam.

²³Yesusva di avna Yerusalemra, nomba mendekli tihva phunvnamba Yutanindnamba. Indkumbiva indhanamba hembra keknam undnahonam lovahthamnavna, noinda himba hevna novna nunglivnam, mendekliandra hev vevnam. ²⁴Heva os Yesusva hembra ninginvnomoa, osva lehra kalmangas, manara noinda himba lihawol vinvna hena nengavnangmba. ²⁵Himba nengvnomoa, osmba mongo indhanarini ishonnara kamo a indhanamomoa. Manara, Yesusva hevpa lihawol vinvna indhanana nengavnangmba.

Yesusva Waiishovna Nikotemusm.

3 ¹Mongo indhanarini lohva, nihilva henamba Nikotemus, himba Varisinindrini. Wo himba mongo mendekli kuwul wulluhuvna Yutanindna. ²Sinimba Nikotemusva provna Yesusindam. Hev omnana, guru, kava nonora lohv, osva yimba guru prona Sesoanamini. An eva mongova vevav mendekliandrava, osva yimba memba vevpa, heva os Sesoa hev waivevra hembra.

³Yesus omnana, lehra yimba ov, heva os kava tanam yemba ishonnava. Indhanariniva hengava nemelalmba lohmba owai vetava, himba nomba osva sihavavmoa Sesoana nemeltindirava. Oi, aval henga hembra lenge. ⁴Wo Nikotemus ophona, wo es hevpa, osva indhanariniva mundkolal, wo hengava hembra lingvav? Himba es eva sihavav hengava avalna emerava, osmba henga sleiha sism?

⁵Yesus omnana, kava ishonnava yemba tanam. Indhanariniva owai vetava, nemelalmba loholmba pona eva Sesoa songolnanamba, himba nomba osva sihavavmoa Sesoana nemeltindirava. ⁶Nomba temba nihnamba nengandvripva, temba nihna. Wo nomba Sesoasongolnanamba phovpa, temba und nemel Sesoanamini. ⁷Ata ye muembta angaviluhvav, memba kava yemba ishonnava, yeoa indkumbimoa henga nemelalm nilhapro. ⁸Nengo, vuviva dalohvpa nosis nosis hevna nengavnangna. Yimba hellev, vuvi olv. Wo heva os yimba tit vev, vuviva henamini prov, hem hengava gav? Eva Sesoasongolva osta, himba indhanamba temba nemelalmba vinvpa.

⁹Nikotemusva os osahmanavna, honamba osva es hevpa, osva vevav? ¹⁰Yesus omnana, yimba mendekli guru luhuv Israelindna.

Wo heva os owai, yimba mendah levrapiyongovmoa honamba? ¹¹Kava ishomnav yemba tanam. Kava ishuv, kav ten nonora avm. Kava ishuv, nom kav ten nunglinam. Wo heva os yimba nomba vreinama, temba nomba kava ishuniva yemba. ¹²Kava ishunvna yemba manam manam hona petharinim, wo heva os yimba kamba hillivnama. Wo eva osta, yimba ata kamba hillivavmoa, kava yemba manam manam ishunvrava senaminimba Sesoanaminiva.

¹³Manara, owai, indanamba mongova indhanariniva vonganamo Sesoaindamba. Kava arana ombol lohv. Arana ombolangas, hengas nominiva venamba, os holapena. ¹⁴Yimba nonora av, nemetva Mosesva wikleihana tira sena saiholamsnamba, nonam di sahal pethara aevulvnam. Eva osta arana ombolva. Arana ombolmba eva osta wikleihivav. ¹⁵Wo indkumbiva himba nomba undnahonamba lovahthamnavrava, himba nomba si wohavav yunalmangas.

¹⁶Manara, Sesoava mindnam und vewol vena indhanam hona pethanindm, wo noinda hevna mongal ombolm wolaihaprana hom. Wo himba nomba ombolmba keknamba undnahonamba lovahthamnavrava, himba si sewonamba owolakovvavmoa, heva os wohavav yunalm. ¹⁷Sesoava wolaihapanamo hevna ombolmba petharamba, lesvhoawol velmba pethanindmba, heva lopshalm pethanindm hevnanam. ¹⁸Noinda himba nomba keknamba undnahonamba lohmanavrava Sesoana ombolmba, si hembra nomba omnavavmoa, os yimba doa owolakohai. Heva os himba nomba keknamba lohmanamba owai venatava, doa himba owolakohai. Manara, himba Sesoana mongal ombolm undnahonam lohmanavmoa.

¹⁹Men plavata, honana indhanamba doa owolakovv. Kava woklasnamba Sesoanaminiva doa prunna pethanindm. Wo heva os pethanindva und vivmoa hona woklamba. Himba und viv sim, noinda himba vivpa sahoklalm manam manam. ²⁰Indkumbiva himba nomba temba sahonamba vivpa, himba ovuv woklamba. Himba si provavmoa woklaramba, noinda si homeis ambara vethamnavm manam manam nom sahoklalm, ten hev vevm. ²¹Wo heva os henomba engvrava moanonoamba, woklakambara aevulv, Sesoana moarava kava vewol viv, woklakowa lehra lovhoaku vinv.

Yon Baptais Moakus Unna, Yesusna Nihiloa Mendekli Lohra.

²²Doa venamba, Yesusva wongavna hevtindimba Yutia provinsnahalm. Wo di Yesusva wonavnamba hevtindimba, pona poswol vavovna indhanamba. ²³Eva Yonmba di pona poswol vavovnata Ainonda murapeta Salimda, manara noinda diva mindnam pomba lungu vevna. Indhanamba ahui vevna, domba gawolmba, pona posvralmba. ²⁴Memba nonam, mendah Yonmba buimeramba wolaihasuvnamao.

²⁵Mongla Yon Baptaisna hellelnind waialhuvna mongom Yutanindrinim, noinda Yutanindna hevna wevsa, hevm pona poswolalm. ²⁶Wo hev ambanamba Yonindam, umnina, guru, nengmano indhanarinim, nom ye ten nemet oholohnam mongnamilm Yotan pora, ten pev hemom ishomana vinvnam, osm ora, himba Kristus lohv. Himba pona poswol vavov, wo indhanamba ten heindamba ahui vev, gawovpa, ponamba poswolalmba heindamba.

²⁷Yon unna, lehra Yesusva nomba temba vevpa osva, manara, Sesoana aralna nengavnangra nomba temba phov. ²⁸Yimba pevpa kamba hella vrivna, ovna, os ishov, kava Kristusva owai. Kava ambo noi, Sesoa kamba wolaihaprana, monam kokolma vremnalm hem. ²⁹Memba osm, mongova indhanariniva ongamba vravpa, wo no ungevliriniva no tendorinina. Wo hena sehelva ambo aongmangas vev no angotalaina moamba, hellengas wohvev. Wo kava eva osta, kava honi mongal undva wulluhmanav Kristusmba. Wo doa osva kamba undnahonam wohkanandhai. ³⁰Henaoa nihiloa mendekli senaoa wohlohra, kamo a kuvhoara he.

Yesusva Noi, Ten Pronam Senamini.

³¹Himba nomba temba pronamba senaminiva, mendeklinonoa, manam manam wohkuvhoawol vev. Indhanariniva hona pethariniva, himba honamangas engv, himba petharinimangas ishunv, nom manam manam ten lohvm pethara. Wo heva os himba nomba temba pronamba senaminiva, he mendeklinonoava luhunv manana manana. ³²Himba ishunvra, nom hev ten vena, nonglanam, eva hellevnam, heva os owai, mongova ovranamo a, nomba temba ishovnamba himba. ³³Heva os mongova indhanariniva himba nomba vravrava, nomba temba himba ishunvpa, doa vilipivongoi, osva Sesoava tanamolnam ishov. ³⁴Sesoa hevna ombolmba wolaihaprana, wo himba ishunvna manam manam pimba, nom Sesoa ten ishonam. Manara, Sesoava hembra pemila vrena mindnam hevsongolnanamba.

³⁵Manara, aralva und vev mindnam ombolmba, wo himba moalamangva kovoraohna, kuwulm wulluhunilm, nonam manimani memba lohvpa. ³⁶Himba nomba keknamba lohmanavrava ombolmba, himba nomba si yunalmba avav. Wo heva os himba nomba hellemba owai vevrava ombolmba, si himba yunalmba almba owolakovvav. Wo Sesoana wusprolva luhunvra heinda, daipota verava, sewonam.

Yesusva Ihishovna Samariaongorinii, Ungundongorinii.

4 ¹Varisinindva ahalovna, ona, Yesusva mindnam pona poswol vev indhanamba hevtindimba, wo hena henga kuvhoawol vev Yon Baptaismba. ²Heva os owai tanamba, Yesusva ponamba poswol vevnamoa indhanamba. Hevtindi poswol vivna. ³Wo Yesusva doara

nonora lohvna, osva Varisinindva doa hillina kanamba. Wo himba nominiva venamba Yutia provinsriniva, henga gana Galili provinsram. ⁴Wo monamba himba gavnamba, himba Samaria provinshovmonam gavna.

⁵Diva Yesusva ganamba, mongona kembella pho, os sevre vrivna, Sikar. Nomba kembelva di mura lohvna ten petha, noi Yakop kovoraohnam hevna ombolm Yosepm nemet doara. ⁶Yakopnamba tovalpva di nolhra lohvna. Yesusva ganamba, kemongla uwit vilomnanamba, di dawonam eha vawovna, no tovalp popethalla. Wo nonamba doa okombava hovrahovra lohvna.

⁷Samaria ongoriniva provna, tovalpm vralm. Yesus omnana hembra, ai, kam vrafo po, ka nei. ⁸Memba honamba nonam vena, hevtindiva di mendah kembella inne esvowolahavna wowonam. ⁹Wo no ungevlirini ophona, kava nihvavk vei, osra yimba kam osahmanavna pom. Wo es hevpa osva yimba Yutanindrini, eva kava Samaria ongorini? Himba noinda osva ona, Yutanindva sesehnamba ahavmoa Samarianindmongova.

¹⁰Yesus omnana, yimba mendah tit vev, nomba manimani Sesoava nis ambo daswolpva. Wo eva yimba tit vevnata, osva an yemba osahmanavna pomba. Yimba doarava lihatava, yimba ata osahmanata kamba, wo ata kava vrafohta pomba yemba, noi yunalm nonapopolm alm.

¹¹Wo ungevlirini omnana, wo hinimini yimba ata pomba vravav, nonapopolmba yunalmba almba? Tovalpva eva mani huimura livma, wo eva yimba mana vemava wulluhvmoa, nonamba veltha vralmba. ¹²Wo es hevpa ye mendekliva lohvma Yakopnamba, pina simbelnamba? Himba kamba vrafohna hona tovalpva. Himba nawovna hevpa honamini. Eva hevna ombtowondalva deuvtatava hlavna honamini.

¹³Yesus ophona, indkumbiva himba nomba hlavrava honamba pomba, si henga hembra peha vinvra. ¹⁴Wo heva os himba nomba nevrava pomba, nomba kava temba daswolvra, si hembra hengava pehava vinvramoa. Wo pomba honamba kava daohvpa, si nilhavav puthovhoal-pomsna, hena nihmerava livra. Manara, kava si hembra undva vrafohvav, nonapopolm yunalm wohalm.

¹⁵Wo no ungevlirini omnana, vrafo kam honi po. Osm si homeis henga kam peha venavm. Wo kava si henga homeis provm hom, vralm pom. ¹⁶Wo doa Yesus omnana, gao, omnakao pevna tlapevm, wo waipro hom. ¹⁷Wo no ungevlirini ophona, owai, kava tlahui av. Yesus omnana hembra, yimba lehra oi, osva kava av tlahui. ¹⁸Heva os es eva yenamba tlalva 5pelarava lovahvna. Wo memba daiopotava yimba hona indhanariniiva ahavpa, yenamba tlalva owai. Yimba kamba honamba tanam wohishomni.

¹⁹Wo no ungevlirini omnana, kava os nonglav yemba, os yimba mongo moashulnindrini Sesoana. ²⁰Kana simbehmunmba sembayang

velvohvna hona olora Samariara. Wo heva os yimba Yutanind owai, yimba os undva wulaevvna, diangas Yerusalemrangas heva lehrava indhanamba Sesoamba sembayang vewuvmonav.

²¹Yesus omnana, kam hello, doa nambaiva mumra prov, nonamba indhanamba si atonglavavmoa, osva vevra, Yerusalemram, eva hona Samaria olorava, sembayang vewuvmonalmba kana aramba. Owai, si vavawonam sembayangmba vilangavra. ²²Yimba Samaraindva nom sembayang vewuvmona velvohinvna Sesoam, nom ten pev tit vrivm. Wo heva os kava Yutanindva liheivna Sesoamba, nomba kava temba sembayang vinivnamba. Manara, honamba moamba, memba Sesoava indhanamba lopshavpa monakoklariniva, moamba honamba ka Yutanind eishoraohv.

²³Wo heva os nambaiva doa mura vev, nonamba osmba sembayangnindnonoava si sembayang vinivra aram Sesoasongolnapopol eva moanonoana wevsana. Doa phoi, noinda honam snam sembayangmba, aramba undva vev. ²⁴Manara, Sesoava ivtovol nihilhui. Noinda hindva nomba temba sembayang vinivpa Sesoamba, heoa sembayang vivra Sesoasongolnapopol eva moanonoana wevsana.

²⁵Wo henga ungevlirini omnana, kava nonora av, osva Mesaiava si provav. (Mesaiava osm uv, Kristus.) Nonamba Mesaiava si provavpa, himba si temura ishunvra manam manam pimba.

²⁶Wo Yesus omnana, kata, kava men yemba ishomnav. ²⁷Yesusva ona mendah ishona, hevtindi ambna kembellini. Wo himba evekingil vithina, noinda himba nunglivna, Yesusva waiisholohv ungevlirinim. Wo heva os mongova hevtindirivna osahmanavnamoa, osva manam yimba vev?, manaram yimba waiishov hembra?

²⁸Wo nomba ungevliriniva sumbva di pelehavna, hevpa henga gavna kembellam. Hev ganamba, unnam nom tendona onganam, ²⁹indhanariniva ishonniva kam, osva owai, mani eva shalohoi, nomba temba kava vaomana vevnamba. Prapiao, angarava, nungli. Es heva Kristusmi? ³⁰Wo indhanamba kembelnindva hulom awona, angavna, nonglalm Yesusm.

³¹Nonamba no ungevliriniva tukvihavnamba, wo hevtindi umnina, guru, neo boasna. ³²Wo heva os Yesus unna, kava iav innemba, nelmba, nomba yimba levrapivolvmoa. ³³Wo hevtindiva hevma asahmana ungu vevna, es hevpa, mongova doarava ipromnaima Yesusmba innemba?

³⁴Doa Yesus unna, kanamba innemba, nom velm, henoi ten hom kam wolaihpranam, manam manam henam velm. Kanamba innemba, lelnam vipialm andram, nom hev ten vraohnam kam velm. ³⁵Yimba os olvohv, weisva mendah samblasambla lovahv, innesrava si os avav nonam. Heva os yem ka ishuny, pevna aong lelahao, keknam mumuvul veo osonnam, doa osonnava nihilangas lohprav.

³⁶Eva daipotava, indhanariniva nomba temba sevrava osonnamba, hembra doa diva dembrahunv. Himba osonnamba huhul vev, nonam

yunaln wohalm. Wo noinda daipotava heoa indk evethavra, vei ten wolanam, eva henoi ten sevm. ³⁷Memba tanam, nonamba pivva uvpa osva, mongo indhanarini wolangav miva, wo heva os mongnindrini seprav sisva osonna. ³⁸Kava yemba wolanga vungu vena, aiselm osonna, nom diva yimba andra vinamo. Mongnind andra vina, wo yimba ambo hena andrara dumbunvra mindnam hengava.

³⁹Wo doa nomba Samarianindva tendona onkana keknam lovahthamnavna undnahonam Yesusmba. Himba undnahonamba av, noinda nom ten ungevlirini ishunnam, hev unna, himba wohishoi temura kanamba, nomba nemetva temba kava vevnamba. ⁴⁰Wo Samarianindva prapiavna Yesusindamba, ishumnivna mindnam, wonalm hevm. Wo himba noinda vewolna samblaninmba diva. ⁴¹Wo doa esvema ambo lovahthamnavna undnahonamba, noinda manam manam hev ten ishunnam.

⁴²Wo hev umnina no ungevlirinim, seilmba kava undnahonam lovahthamnavna Yesusmba, noinda ye kam nom ishunnam. Wo heva os daipotava kava keknam av undnahonam, noinda kava kav hilliva. Kava nonora av, os men hona indhanarinita, hengamba indhanam lopshalmba pethanindmba.

Yesusva Sishona Vremnana Kuwulna Otolm.

⁴³Nomba samblaninmba vewolnamba, sismba Yesusva nominiva venamba, gavna Galili provinsram. ⁴⁴Manara, Yesusva doara ona, nemetva os moashulnindrinimba hevna kembelnindva beswonamba longong vrvimoa. ⁴⁵Nonamba Yesusva phonamba Galilirava, wo diva indhanamba hembra windemona ohul vrvina. Himba doara ambnata eva no mendekli tihrama Yerusalemrava, wo diva himba doa nungeilna Yesusna mendekliandramba.

⁴⁶Yesusva henga nungsis velm gavna Keina kembellam Galiliram. Men huita doarava Yesusva weihaloh vrena pomba wainpolalmba. Doa nonamba mongo kuwul himba di avna Kapaniam kotara. Himba king kuwulna andranindrini, wo hena ombolmba uvavul venavna. ⁴⁷Wo no kuwulva hellena, ona, Yesusva doa prona Yutia provinsriniva, men av daipotava hui Galili provinsra. Wo himba gamnavna, Yesusm yinavana ovrilm hem, prolm Kapaniamram, wo sishona vrelm ombolm. Otolva doa murapeta dahapiav.

⁴⁸Yesus omnana, yimba hona indhanamba ambo osm viv, boasna kava heva nunglivrava mendekliandramba kavna novna, wo os heva kava undnahonamba lovahthamnavra hembra. ⁴⁹Wo no kuwul omnana, guru, lelnam pro, ata homeis lelnam otolm kana dahavm. ⁵⁰Yesus ophona, gao, otolva ata yenamba beswonam avav. Wo no kuwulva wohkek vethana, nom ten Yesus ishomnanam, wo os gana deuvramba.

⁵¹ Wo monaram hevna andranindva ambvna, anongla venamba. Hev umnina, yenamba ombpevpa doa beswonam av. ⁵² Wo hev sah owol vevna, unna, wo henanam hevpa okombava hi lohvena, os kana ombva kanandhana? Hev umnina, okombava mara koho lohvhovnama ambo, os nihvuvrava hembra wuleihana. ⁵³ Wo aralva nengna, okombava nonamba koho lohvhovnamba, nonamba Yesusva osva onamba, yenamba ombpevpa ata henga kanandhavav. Wo doa vena, no indhanarini, eva noi ten avna hena devra, himba doa Yesusmba keknam undnahonam lovahthamnana. ⁵⁴ Membra honamba mendekliandrava Yesusva hengava sismba venamba, himba Yutia provinsrini pronamba, Galili provinsra avnamba, os vena.

Yesusva Mongom Monglamungilm Sishona Vrena.

5 ¹ Wo sismba Yesusva gavna Yerusalemba, Yutanindna mendekli tihram. ² Wo diva Yerusalemrava doara mongova tovalpva livna, wo ovavholmba vuhembra 5pelara vewol velohvna tovalpsisva. Wo Hiprumonamba os sevriv, Betesta. Wo nomba tovalpva di mura livna kotapultuvrava, os ningthiv sipsipna tuv.

³⁻⁴ Uvavulmungilnindva ovna mana ema vendholahola vev no ovavhollava diva tovalpsisva. Monglava novtitmungil, monglava monglakoklana, monglava kemindina. ⁵ Wo nomba uvavulnindva, doara di mongova vendholotholohvna ovavholla, himba uvavulmba os dihelomana vena, venamba, tahonmba ambo os lohmanavna 38pelara.

⁶ Yesusva nonglanamba no indhanarinimba, wo nengna, himba noi ambo doaramini snangas wohvindilv. Wo doa venamba, Yesus osahmana, es hevpa, yimba os nengvma, kamo henga kanandhara? ⁷ Wo no uvavulmungilnindrini ophona, eye, heva os owai, an eva ata kamba aiv vindilpihavta tovalpmeramba, nonamba pomba punivtiva vevnamba? Kava lehlohvna, osm kasna mi kaoa pihai pomeraoa. Wo heva os nonamba kava lehlohvnamba, owai, monglava indhanamba kamba aiv vreipra vrelvohvna sism.

⁸ Wo doa Yesus omnana, phorava, undund lohvhoo. Pevna vuhesal dombrava, gao. ⁹ Wo nungi lelnam ambo hembra wohlesvhoana. Wo himba hevna vuhesal dombnamba, os gana. Hona okombanamba manimani himba memba vevnamba, vah iaevul okombanam.

¹⁰ Wo Yutanindva umnina no indhanarinimba, temba Yesusva sishona vrenamba, detiva vah iaevul okombanamba, aembu, ata ye pevna vuhesal ingavav deti, yimba pivnam lohohmom pilpikohav memba osva. ¹¹ Wo heva os hev unna, indhanariniva temba kamba hengamba sishona vreiva, omni kamba, os dombrava pevna vuhesal, gao. ¹² Wo hev osihminina, wo an no indhanariniva, temba yemba wuhhoiva, dombolmba pevna vuhesalva, ivohalmba? ¹³ Wo heva os no indhanariniva, himba tit

venavna, osva an dihi himba. Manara, indhanamba no kembellava novpa es eva ata piasovta, wo nokulmonam Yesusva dasvovhoana nominiva.

¹⁴Wo sism henga Yesusva no indhanarinimba ona nonglana, men av tempelmera. Wo hev omnana, hello, yemba doa wohkanandhana. Wo hengava manam yimba sahonamba vevav, osra si mana vemava mendekli nonglaphovav yemba. ¹⁵Wo no indhanariniva phonamba, ga, owalm Yutanindm yih. Hev unna, noita Yesusva, ten sishona vrenam kam.

¹⁶Yesusva vena honamba vah iaevul okombanam. Wo noinda Yutanindna kuwulva sahonam venalm vinivna hembra. ¹⁷Wo heva os hev unna, kanamba aramba wuleihanamo andrava. Wo kava eva os andra vevta. ¹⁸Wo hona moamba nomba Yutanindna kuwulmba otuhtuvna, himba keknam lihvna, helvakomandhalmangas Yesusmba. Hev una, seilmba lohohmomba vah iaevullinim pilpikohana. Wo hev vena, os ona, Sesoava hena aralnonoa. Wo os himba hevmba os vrev, kava lohohra Sesoava elohv.

Yesusva Wulluhvna Moalamangva Sesoana.

¹⁹Yesus kuwulmba nomba opla vrinna, kava ishunv yemba tanam. Ombolva mana vemava vevavmoa hevna nengavnangnamba. Ombolva vev nongas, ten hev nonglavm, nom aral vevm. Ombolva nomba temba vevpa, aralva eva nomba vevta. ²⁰Aralva mindnam und vev ombolmba, wo aralva novpa wolaihamnav ombolmba, noindava manimani himba hevpa temba vevpa. Wo heva os aralva si novpa wolaihamnavav ombolmba manam manam mendeklim, honamba kana mendekliandramba henga kuvhueivra. Wo yimba indkumbiva si evekingil vruwul vevra.

²¹Aramba wolapho vewol vev indhanamba, nomba temba dalvpa, wo undnonoava henga daswolv hembra. Wo eva osta ombolva daswolv undva, nomba temba hevpa ninginvpa hembra. ²²Wo eva aramba lesvhoawol vevmoa indhanamba. Wo heva os aralva doa ombolm moalamangva kovoraohna, indhanamba lesvhoawolalmba. ²³Sesoava honamba osm vena, indkumbiva indhanamba si longong vrivra ombolmba, os ten hev longong vrinvm aralm. Himba longong vremba owai vivrava ombolmba, eva aralmba longong vrivmoata, hem nomba temba ombolmba wolaihapranamba.

²⁴Kava ishunv yemba tanam. Himba nomba hillivrava, nomba temba kava ishovrava, wo undnahonamba lovahthamnavrava hembra, nomba temba kamba wolaihapranamba, himba si beswonam avav yunalm. Hembra si lesvhoawol vivavmoa, osva ora, himba indkokla vivna. Heva os himba doa doara wuleihina dahalmba, wo saivna, alm yunalm daipotava. ²⁵Kava ishunv yemba tanam. Doa nambaiva mura vev, wo doa phona, indhanamba temba sihanamba, himba si hillivra moalamangmba

Sesoana ombolnamba. Wo himba nomba si hillivrava, himba si undna beswonam avav. ²⁶Undva nonapopolmba almba, phov aranamini hevnamini. Wo aralva wolaihana ombolm, osva henamini vravra, undva nonapopolmba almba. ²⁷Wo aralva vraohna ombolmba moalamangva, lesvhoawolalm, noinda himba lohvna aralna ombol.

²⁸Manam yimba nengavnangva vivra mindnamba honamba. Doa nambaiva mura vev, nonamba temba doarava hembra dalnamba, wo pokamara shav, si hillivra hena moalamangmba. ²⁹Wo himba si os phosohvra hevna pokamariniva. Wo nomba temba beswonamba himba vivnamba, si wolapho vevra, wo avra undnapopolm yunalm. Wo heva os himba temba sahonamba manimani vivnamba, hembra si wolapho vevra, lesvhoawolalm, osra doara doa yimba owolakovvna.

Yesusva Sesoana Ombol.

³⁰Yesusva mendah ishunvna Yutanindna kuwulm, kava es eva vevav mana vemava kavna nengavnangnamba, owai. Kava nomangas wohengv, ten kam omnam velm hev, wo noinda kanamba lesvhoawolalmba lehra lohv. Manara, kava kavna nengavnangnamba vevmoa. Kava osm vev, heoa und lothora, temba himba kamba wolaihapanamba. ³¹Kava kavhova yemba ishunilmba kavna andramba vevrava, yimba si kek vithivramoa, nomba ishunvrava kava yemba. ³²Wo heva os ten mongova indhanariniva lohv, himba kamomba ishomana vinv. Wo kava nonora, nomba manam manam himba ishomana vevnamba kamomba, tanam. Memba kana ara.

³³Yimba doara wolanga vivna indhanamba Yon Baptaisindam. Wo himba yemba ishunvna moanonoam kamom. ³⁴Kava mindnamba nengvmoa, osva Yon Baptaisva ishovra kamomba. Heva os kava ov honamba, osm yimba si kamba undnahonamba lovahthamnavrava, wo Sesoava yemba si lopshavav. ³⁵Yonmba sna lohvna, ovna, tav woklasowa. Wo yimba indkumbiva indk vithivna henambarava nonam.

³⁶Wo heva os kanamba nethalmba noi mendekli, Yonna kamomba henga kuvhoav. Noi manimani mendekliandram, men kav vewol vevm, nom nethalmba nungliv. Memba manimani, noi ten ara kam dembraohnam velm. Noi mendekliandrara osva nungliv, ara kamba wolaihaprana. ³⁷Wo ara henoi, ten kam wolaihapanam, hev kamomba ishov. Heva os yimba es eva hillivav hena moamba. Wo yimba es eva nunglivav, osva ora, snal himba dihi av? ³⁸Henamba moamba yimba kek vithivmoa, manara, yimba keknamba undnahonamba lovahthamnavmoa, nomba temba aramba wolaihapanamba hembra.

³⁹Yimba temura beswonam levrapivolalm viv tombaimomba doaraminim, manara, yimba os ningv, kamba daswolv, beswonam alm yunalm. Heva os nomba temba mongawa tombaimomba doaraminiva

ishov kamom. ⁴⁰Heva os yimba kongswil vev, ambalmba kaindamba, osalmba kaa yunalmba beswonam ai.

⁴¹Kava provmoa, osmba kana nihilmba wivivra. ⁴²Heva os kava yemba os nongalv, yimba Sesoamba undvivmoa. ⁴³Manara, kava prona kavna aranamini, kava hena moamba wulprona. Wo heva os yimba pevna undnahonamba kamba holvoreivmoa. Heva mongova indhanariniva provpa, wo himba ishovpa moamba, hevmangas ishov, wo yimba hembra holvoreiv.

⁴⁴Yimba osm viv, kamo a okolowol vivra henoi henoi. Wo heva os yimba ningvmoa mindnamba, osm Sesoa kamo a okolowol vevra, himba temba mongal avpa. Wo es hevpa eva yimba undnahonamba lovahthamnavav kamba? ⁴⁵Manam yimba osva ningvav, kava si yemba ishuvav arana novra, osva yimba indkokla vivna. Moses si yemba wetat owol vevav, osva yimba indkoklava wohvivna. Wo yimba hem osva ningminiv, he si kamba wonolohvav. ⁴⁶Yimba tanamba keknamba undnahonamba Mosesmba amnatava, eva yimba kamba os amnavrata, manara noinda Mosesva novol vewol vena kamom. ⁴⁷Wo heva os yimba kek vithivmoa honamba, memba Mosesva novol vewol venamba. Wo noinda osva es eva yimba kek vithivav, nomba temba kava ishovpa.

**Indhanamba Mara Os Lohnama 5,000Pelara, Nomba Yesusva Dahwol
Vevnamba Innemba.**

Matiu 14:13-21, Mak 6:30-44, Luk 9:10-17

6 ¹Wo doa venamba, sismba himba gavna mongnahalmba Galili plombpethallam, ambo weihaloh vriv, vev, os sevriv, Galiliplomb, eva Taiperiasplomb. ²Indhanamba ahuiva vevna, hembra sismba telgalmba, noinda himba hevna novna nunglivnam mendekliandram, hev ten sishona vewol vevnam uvavulnindm. ³Doa mongnahal wonphonamba, olora wonvonganamba, di wonovhoa. ⁴Wo nonamba doa Yutanindva ungemira ovhoapihavna, tih mendekli mumra vinvnamba, Pasovatih.

⁵Wo noinda Yesusva ona nov venga vena, indhanamba pomba ten kihev, os provna heindamangas dom. Hev omnana Pilipm, hi hevpa ata pivva innemba sovawol vivav, hona indhanamba dahwol velmba? ⁶Himba ambo osm Pilipm lehvna, verava, ora os ov Pilipkova. Hevpa doara nengna, osmba ona, ata kava os vevav. ⁷Wo Pilip ophona, owai, pivva heva boasna mongawawusnam diandrava vivav, di wulkusovav, esvemam rotim dombolm, osm indakondam singthalm hem ambo, osm eskand eskand.

⁸Mongova hevtindirivna doara di lohvna Endru. Himba Simon Pitana boasalal. Endru ona, ⁹men mongo tuendisrini ilohvpa 5pelara bali bretva, tambkova sambla. Wo heva os honamba ata lehra vethavvmoa sna indhanamba.

¹⁰Yesus unna, os ishunu hemoa, ovhoaprara. (Ilva vavawonam lohv temba diva, wo indhanamba diva avnamba, nomba os avna 5,000pelara.)

¹¹Wo doa Yesusva nomba bretva dombnamba, nehvongo ovomnavna Sesoam, yimba lehra, no bretna, wo doa os povmang viwul vinvna no indhanamba, temba avnamba ilsrava. Wo eva tambkova os venata. Himba os dahwol vena, venamba, doa mengva indkokla vilunvna henamba.

¹²Nonamba himba hlanamba, doa venamba, ambo lokovoko gavna, eva ata mana eram hengava uta, owai. Yesus unna hevtindim, eunumbuloa bretna tambkonoa huhul viu, nooa temba nalohungu vevpa eunumbulva. Ata ye wuldiavav. ¹³Wo himba vinamba, henga temura huhul vivna nomba eunumbulva, temba nalohungu vevnamba. Wo hengava songovranamba eunumbulva, 12pelara songoihalohna sumbrava nomba bretna tambkonamba.

¹⁴Wo indhanamba nonamba no mendekliandramba nunglinamba, temba Yesusva vevnamba, hev una, himba dihi tanamolnam nomba moashulnindriniva, temba Sesoava wolaihapralmba onamba hona petharamba? ¹⁵Yesusva doara nonora lohvna, osva himba nengavnangva vrvna, kekel velm kam, waiangalm, aivol velm kam, king kuwulalm wulluhunilm hev. Wo noinda himba nominiva venamba, os henga gana hevho oloram.

Yesusva Gavna Sena Posra.

Matiu 14:22-33, Mak 6:45-52

¹⁶Wo no okomba vohanamba Yesustindiva peivna Galiliplombram. ¹⁷Wo doara wohkilvrana, wo heva os mendah Yesusva engalpravnamoa hembra. Hevtindiva botra vongopianamba, doa ahnam os hiliwelgivna Kapaniamram. ¹⁸Wo vuviva snavema dalohvna, wo vuviva vevnamba, otuhhovna plombm, plombva ovram vongavna.

¹⁹Himba mara botva ambo os wulanganama 5pelami 6pelami kilomita tokwonamba. Wo himba ona nunglina, Yesusva ten posra sena prov botram murapetam. Wo hevtindiva pemba os viwul vevna i. ²⁰Wo heva os Yesus hev unna, manapenam yimba viv? Memba ka. ²¹Wo himba indk vithivna, wolaihavolalmba Yesusmba botramba. Wo nungi lelnam ambo pulvona, diva temba hevpa angavnamba domba.

Indhanamba Avnamoa, Etapewolvna, Nonglalm Yesusm, Nomba Hevpa Temba Dahwol Venamba.

²²Wo venamba, mongnasiva nomba indhanamba di mendah wohaevulvna mongnamilm Galiliplombnahalm, nomba temba Yesusva dahwol venamba innemba. Himba os ningvna, Yesusva dihi es vei, wongaimoa botrava hevtindimba, wo botva mongova owai.

²³Doa nonamba monglava Taiperiasrini botva pepra vei. Wo himba di pepavevna, ten nolhra hev inne mendekli hlanam. ²⁴Wo nomba indhanamba nunglina os, pai owai, Yesusva hevtindimba huiva wonlohvmoa. Wo himba nominiva vinamba, nomba botra vongopiengu venamba, angavna Kapaniam, aslaluvmona velm Yesusm.

Yesusva Inne, Yunalm Wohalm Nokram Nonapopolm.

²⁵Wo himba nonglapulvonamba diva Yesusmba mongnamilva plombrava. Hev umnina, guru, henanam yimba homba prona? ²⁶Yesus unna, wo es hevpa yimba eva kam sah ambvma, noinda yimba kamba nunglina, kava mendekliandra vevna, wo yimba kam lovahthamnalm vevma? Owai, yemba kava tanam ishunv. Yimba sah ambvna ambo kam, noinda yimba bret hlanamba, os venamba, ambo lokovoko gavna. ²⁷Hillu, innemba pethariniva lelnam ambo pindta vungav. Wo noinda osva manam yimba andra vivra, nomba innemba dombolmba. Heva os andra vivm, innem dombolm, nom nokrava si yimba yunalm wohavra. Arana ombol si yemba daswolvra no innemba. Sesoava aramba doa ambara velahana, osva himba hevpa waiav nihra arana ombolmba.

²⁸Wo no indhana umnina, manam Sesoava ninginv kamba, vinilmba? ²⁹Yesus unna, andrava Sesoava yemba ninginvpa, men honam, keknam undnahonam lovahthamnalm, nom ten Sesoa hev wolaihapanam hom. ³⁰Wo no indhana opulvona, mani mendekliandrava ata yimba vevav? Osm kava ata nunglivav nomba mendekliandrava, wo osva si kava yemba keknam undnahonamba lovahthamnavra. Ata es yimba vevav? ³¹Manara, tomonalva pinamba innemba manava hlana sahal pethara. Os novol velohv doaramini tombaimorava, Sesoa daswolna innemba senamini hembra, hlalmba.

³²Yesus unna, yemba kava ishunv tanam, owai Mosesva, temba pina simbehumunmba daswolnamba innemba senaminiva. Heva os kana ara vinna, wo daipotava himba yemba men daswolv innenonoava senaminiva. ³³Sesoana innemba, noi indhanarini, ten holvopenam senamini, wo henamini undnonoava vrav pethanindva huiva petharava.

³⁴Wo indhana henga noi opulvona, guru, eva yeoa no inneoa kamoahawol vawota elsus. ³⁵Wo Yesus ophona, ka menta innemba, nomba nokrava yunalmba almba. Himba nomba homba sihavrava, hem nomba si ponmba venavramoa hengava. Himba nomba keknamba lohmanavrava kamba, hembra nomba si hengava pehava venavramoa.

³⁶Yemba doa seilva kava ishuni, wo eva yimba doa kamba nungli, wo heva os owai, yimba kamba amnavmoa keknamba. ³⁷Aramba indhanamba pethanindmba kamangas wohwolamnav. Wo indakonda himba si pepra vevra kaidamba, wo kava ambo hembra holvorombolangas vevra. ³⁸Kava holvopena senaminiva, velm nom,

kam Sesoa nengmanavram, nom velm. Kava osmba pronamoa, vevra manimani ambo kavna nengavnangna.

³⁹Wo noinda osva kava mongova bumbrisivavmoa, nomba temba Sesoava kamba wolamnanamba, wo kava hembra si wolapho vevav, nonam ovi pethai hoai evewolvram, Sesoava indhanamba lesvhoawol vevav. Memba honamba, himba kamba wolaihapanamba, himba nengmanav kamba, velm osm. ⁴⁰Indkumbiva himba nomba temba nunglinamba ombolmba, wo keknamba amnavnamba hembra, himba nomba av yunaln. Kava si wolapho vevav, nonam ovi pethai hoai evewolvram. Men honam, osm kana aramba undva vrev.

⁴¹Wo doa Yutanindva eishomnavna mindnam Yesusbma. Himba eishovna noinda sahonamba, he os onamba, kava inne senamini venamba, holvopena petharam. ⁴²Himba hevm eishovna, memba himba Yesus. Pimba lihewulminiv aralimba avalimba henamba. Himba ambo Yosepna ombol. Wo es hevpa himba osva oi, kava holvopena senamini?

⁴³Wo doa Yesus opla vrinna, beswonam ambo maivithu, ata ye kam sahonam ishumnivav. ⁴⁴Ara kamba wolaihapanamba. Anvema mongo provav kaindam, heva os ara boasna hena nengavnangva tuhlohmanarava, wo os provra kaindamba. Wo ovi pethaiva hoai evewolvra, si kava wolapho vevav hembra pokamariniva. ⁴⁵Moamba men novol velohv moashulnindna tombaira. Sesoava si numhowol vevav indkumbimba indhanamba. Wo indkumbiva himba nomba hillivrava aramba, nowolva henaminiva dumbvrava, himba si kaindam ambvra.

⁴⁶Mongova doava aramba nonglanamoa, henongas ten hanoi pronam aranamini. Hengas doava nonglana aramba. ⁴⁷Yemba kava tanam ishuvv, himba nomba kamba keknamba undnahonamba amnatava, himba si avav yunaln. ⁴⁸Manara, kava inne, noi yimba yunaln wohavav nonapopolm.

⁴⁹Pina simbehumunmba temba innemba manava hlanamba sahal petharava, wo heva os doara doa hembra wohdalpiana. ⁵⁰Heva os kava memba inne, noi ten holvopenam senamini. Wo himba nomba netava honamba innemba, hembra nomba si dahavavmoa. ⁵¹Kava inne, noi nonapopolm yunaln alm, holvopena senamini. Wo himba nomba nevrava hona innemba, himba si yunaln wohavra. Memba honamba innemba, kana kavna nihilnonoa. Kava si daswolvra kavna nihil, osm pethanindva si nonapopol avra.

⁵²Wo nomba moamba Yutanindva ona hillina, wo hevm alhuvna. Hev uvnam, es hevpa hona indhanariniva si daswolvra hevna nihilva pimba, hlalmba? ⁵³Wo henga Yesus unna, kava ishuvv tanam yemba. Yeoa hlangas vevm arana ombolna nihiloa. Wo eva osoa hlamnavm hena tovoloa. Yimba honamba osmba owai vivrava, wo eva osva yimba si mananapopol wohavra yunalmba?

⁵⁴Himba nomba kana nihilna tovolnamba hlavrava, himba nomba si wohaeuvlvra yunaln. Ovi pethaiva hoai evewolvra, kava si hembra

wolapho vungavav pokamariniva. ⁵⁵Kana nihilva innenonoa. Kana tovolva pononoa. ⁵⁶Himba nomba nevrava kana nihilna tovolnamba, himba kanamera avra, wo eva kava heinda avra. ⁵⁷Ara kamba wolaihaprana. Ara avpa, wo kava eva avta, manara noinda arainda. Wo noinda ova himba nomba temba hlavpa kana nihilva, si aevulvra yunalm, manara noinda himba kana nihilmengna.

⁵⁸Kava innemba snamba owai, temba pina simbehumunmba hlanamba sahal petharava. Himba noi inne hlana, wo heva os hembra wohdalpiana yunalm. Kava no inne, ten holvopena senamini. Himba nomba nevrava hona innemba, si wohavra yunalm. ⁵⁹Yesusva ishunvna manam manam honamba, di hev ten numhowol vevnam sembayangduvra Kapaniam kembella.

Memba Honamba Moamba, Yunalm Alm Moa.

⁶⁰Wo hevtindiva nomba Yesusnamba hillinamba honamba, monglava himba os uvna, hona moamba owai, mindnam kin vev. An hevpa eva hellevav ata? ⁶¹Wo Yesusva lihawol vena, ona, himba moamba ishuv hona kana moara. Wo hev unna, es hevpa hona moamba yenamba undmba indkokla vewol vinima? ⁶²Wo eva indkokla vewol vevavma yemba, nonglalmba, nomba arana ombolva hengava gavrava, domba temba hevpa nominiva pronamba? ⁶³Nihva indhanamba daswolvmoa undva, nonamba almba. Owai, Sesoasongol hev daswolv undva, nonamba almba.

⁶⁴Wo heva os yimba monglava keknamba avmoa. Yesusva lihawol vevna, ova ovna, himba honamba undnahonamba keknamba lohvmoa. Himba os lihawol vena, nemel mendah ten hev saivnam. Wo hev vena, doara nonglana, ova ona, hehoni si kamba indkoklava vrevav sewonamba. ⁶⁵Yesus unna, yimba monglava keknamba avmoa, noindata ova kava ov, aramba indhanarinimba kamba wolaihamnamba owai venavrava, wo eva owaita, himba nomba provramoa kaindamba.

⁶⁶Yesusva honamba moamba ishopianamba, mindnamba hevtindiva os dasva buona hembra. Os wohnombolvhueina, hengava hembra engvalvohmana vevnamoa. ⁶⁷Yesus osihinna no 12pelaram monglam hevtindim, wo es hevpa eva yimba angawulalm vevmata?

⁶⁸Simon Pita omnana Yesusm, mendekli, henahalm ata kava angavav? Yimba wulluhv moamba, noi ten daswolvm und besal, nonam yunalm alm. ⁶⁹Kava yemba keknamb undnahonam lovahmanav. Kava nonora, ova yimba nomba temba Sesoava onamba, wolaihapralmba.

⁷⁰Wo Yesus ophona, lehra yimba ov, kava doa yemba 12pelara kikih vewol vena. Heva os mongova yeriniva Setanmsna lohv. ⁷¹Yesusva onngamnavna Yutasm, Simon Iskariotna ombolm. Yutasva noi, mongo 12pelarini Yesustindirini lohvena. Heva os sewonamba himba si Yesusmba ungun dna englara bumb vinvav, ungun dtatalm vendalm.

Omollava Hevpa Yesusmba Undnahonamba Lovahthamnavnamoa.

7 ¹Wo sismba nonamba Yesusva di lohmana vevna Galili provinsrangas. Himba galmba vevnamoa Yutia provinsramba, manara, Yutanindna kuwulva doa hembra muembnavho vrinamba, helvakomandhalm. ²Wo nonamba doa Yutanindnamba tihva mendekliva kuksaduvriniva mumra vinvna. ³Wo hevna towandaslal umnina, yeoa honaminioa verava, gao Yerusalemram tihram. Wo yetindiva di nunglivav, mendekliandrava yimba vevrava.

⁴Manara, himba nomba museramba loholmba vevpa, osmba annind annind kamo nonora amnavra, wo komavramoa, nomba hevpa temba manimani vevpa. Yimba honamba manam manam memba vevpa, pevm musera eva hulvundthueinuta annindm annindm. ⁵Himba noinda osva ishumnivna, owaita, hevna towandaslalva hembra lovahthamnavnamoa keknamba undnahonamba.

⁶Wo Yesus unna hevna towandaslalmba, kanamba mendah prov. Heva os yimba angalmba vetava, ambo yepev ora men honanam. ⁷Manara, annind annind pethanindva si yemba daosva wulambinramoa. Wo heva os kam vinivra, manara, kava ishunvpa nom manam sahoklalm, hev ten vivm. ⁸Wou, doa yeoa angavm no tih mendekliramo. Ata kava domba provavmoa. Nambainonoava mendah kanamba provmoa. ⁹Himba honamba hembra osva ishophieinnamba, himba hevho dawonam di wohana Galilira.

¹⁰Wo towandaslalva doa os gapiana no tih mendekliramba. Wo venamba, ona, doa wohgapiana, wo eva Yesusva ambo ketkoat hembra os petheinna sis. Wo heva os himba os vevna, diva ata indhanarini kam homeis lihavm mongo.

¹¹Wo no tihrava Yutanindna kuwulva hembra di etapewulungu vevna, uvna, dihi es vei? Hev una, hi no indhanariniva av? ¹²Wo indhanamba diva avnamba, owai, ambo missra holvodesvhoavna. Wo himba hevm eishovna. Monglava uvna, himba indhanarini besal lohv. Mongla uvna, owai, himba moam kokomana vinvpa indhanam. ¹³Wo heva os owai, an eva andralva ata bambanamba muserava osva ota? Manara, himba pem vinvna Yutanindna kuwulnapenam.

**Yesusva Di Tihmera Yumna Vewolnamba,
Osoa Ambo Wohnumhowol Vevna.**

¹⁴Wo tihva doa hovrahovra vrivna. Wo Yesusva sihanamba tempelmera, wo osoa ambo numhowol wohvevna. ¹⁵Wo Yutanindna kuwulva di evekingil vruvul vevna, hev una, hona indhanariniva owai, numha vrinamo, osva memba pimba, wo es hevpa himba nonorangasva lohv?

¹⁶Wo Yesus unna, manam manam memba kava yemba numhowol vevpa, owai kavnamba, kanamba moamba prov, henona ten henoi kam hom wolaihapranam. ¹⁷Himba nomba mongova undva vretava, Sesoana moamba keknamba engalmba, wo himba osva levrapivongovav moana plalmba, honamba memba kava ishovpa, prov Sesoanamini. Wo himba si nonora lohvra honamba moamba, osva memba kanamba owai. ¹⁸Himba nomba numhowol vevrava hevna nengavnangnamba, himba ambo hevm osm temba vevra, kakowa lehra lohv. Wo heva os himba nomba venavrava, okolalmba hembra nomba, himba temba hembra wolaihapranamba, no indhanariniva ishov tanamolnam. Heindava mana vemava dasalmba lohvmoa.

¹⁹Mosesva doa lohohmomba yemba vrahunna, wo heva os yeriniva mongova nomba engvmoa lohohmomba. Wo manara yimba kamba helvakomandhalmba viv? ²⁰Wo indhana noi di avna, hev umnina louwolm, tihsongokokla yeindava nihrava sihaiva, noinda yimba memba osva daimora ishov. Kava helvakomandhalmba vivmoa yemba.

²¹Wo Yesus unna, kava vena mongal mendekliandrava vah iaevul okombanamba, wo yimba indkumbiva evekingil avramana vena. ²²Heva os yimba pevpa eva andrava vivta vah iaevul okombanamba. Manara, Mosesva doa yemba lohohmomba vrahunna, hutovmomba koalmba. Wo heva os honamba Mosesnamba owai. Hutovpa koalmba, pina pivna simbehmunna wevsa. Wo yimba noinda pevna otovotalnamba koalvuhinv vah iaevul okombanamba.

²³Temba yimba osm vivna, otolnamba hutovpa kueinilmba vah iaevul okombanamba, wohengalm Mosesna lohohmom. Wo manara yimba eva kamba wusapramana venavna, kava nonamba vah iaevul okombanamba wohsishona vrevnamba mongomba indhanarinimba? ²⁴Manam yimba pevna novnamba nisva kana andramba lesvhueivav, yeoa pepthanam viuta, manam yimba seposamba vivav.

Es Hevpa, Yesusva Kristus Lohvma?

²⁵Monglava indhanamba, nomba diva temba avnamba Yerusalemrava, hev una, hona indhanarinimta, dihi mundilva helvakomandhalmba vivnata? ²⁶Wo heva os himba numhowol vev men, wo indkumbiva vev, nungliv novna, eva hillivm aongna. Wo noinda osva an eva hembra ovomnavav, owai. Osm dihi mundilva os ningvna, himba tanam Kristus? ²⁷Heva os kava nonora lovahv, nomini hona indhanariniva. Wo nonamba Kristusnonoava si provavpa, mongova indhanariniva si osva olhavavmoa, hinimini himba.

²⁸Yesusva mendah di numhowol vevna tempelmera. Hev mindnam vevandnam unnam, tanamta, yimba kamba nonora amnav, wo eva yimba nonora av, osva henamini kava pronva. Wo heva os

kava kavna nengavnangna pronamoa. Kava prona nona, henoi ten kam wolaihpranam, wo himba moanonoa ishov. Heva os yimba levrapivolvmoa hembra. ²⁹Heva os kava kavpa lihav hembra, noinda kava henamini, wo he kamba wolaihprana.

³⁰Henanam honamba moamba Yesusva ona wulihana, diva indhanamba nomba avnamba, himba kevralm vivna hembra. Wo heva os owai, an eva ata englava piata. Manara, noinda henamba nambaiva murava provnamoa, kevralmba. ³¹Wo heva os monglava hembra keknam undnahonam lovahthamnavna. Hev una, nonamba Kristusva si provavpa, si himba mindnam mendekliandrava vevavma, os men hona indhanarini vevnam?

Yutanindna Kuwulva Kevralm Vivna Buiram Yesusmba.

³²Varisinindva hilwilvna, ona, indhanamba os eishomnav Yesusmba, noindava manimani himba temba vevnamba. Wo doa vena, sembayang andranindna kuwul eva Varisinind, himba wolanga vivna tempelduvna polisimba, kevralm Yesusmba. ³³Wo Yesus unna, kava si yemba ambo wonasambaihavav, kava si henga gavav araindam. ³⁴Yimba si kamba aslaluwuvav, wo heva os yimba si kamba nunglivavmoa. Wo yimba ambvramoa domba, diva kava avrava.

³⁵Wo Yutanindva hevmba os eishungu vevna, henahalm hevpa galm ov, wo noinda pivva si hembra asahlihavav? Si himba gavmi Griknindna kotaram, dom ten pivna owal eungu vinvm di? Si himba numhowolalm gavmi Griknindm dom? ³⁶Wo hev oi, pivva si aslavra, wo heva os pivva si nunglivavmoa. Wo hev vei, os oi, yimba ambvramoa, diva kava avrava. Wo es hevpa memba osvav oi?

Yesusva Sesoasongolmom Ishovna.

³⁷Muhuvhoavna nomba tih mendekliva doa eunillam. Doa Yesusva phonamba, hev mindnam vevandnam unna, yemba mongova snallava pehava venatava, heoa nooa prora kaindam. ³⁸Indhanariniva kamba keknamba undnahonamba lohmanatava, pomba nonapopolva avpa, si ongovra hena undrini. Os novol velohv tombaimorava. ³⁹Yesusva ishovna Sesoasongolm. Mendah Sesoasongolva prunnamoa, manara, Yesusva mendah phonamoa hevna pusambakambara. Wo os sewonamba himba nomba undnahonamba lovahthamnavrava Yesusmba, si lundthoavra hembra Sesoasongolnana.

Indhanamba Hevmba Alhuna Yesusinda.

⁴⁰Indhanamba nom hillinamba, ten Yesus ishovnam. Wo mongnind opulvona, hona indhanariniva tanam nomba moashulnindrini loh, temba Sesoava wolaihpralmba onamba. ⁴¹Wo mongnind opulvona,

heta Kristusva, wo henga he unam, Kristusva si provavmoa Galiliriniva. ⁴²Doaramini tombaimorava os novol velohv, Kristusva si provav Devittindirini. Wo doaramini tombaimoa vena, os ona, Kristusva si provav Betlehemrini, no kembellini, ten Devit anam.

⁴³Wo doa nomba indhanamba nengavnangva vruwul vevna, epowalwolalm evevna Yesusindam. ⁴⁴Monglava himba kevralm vivna Yesusmba, wo heva os an eva ata hembra englava piata, kevralmba?

**Yutanindna Kuwulva Owai, Undnahonamba
Keknamba Amnavnamoa Yesusmba.**

⁴⁵Wo no tempelduvna polisiva henga anganamba, di nongalpulvoa sembayang andranindna kuwulm eva Varisinindm. Wo no kuwul osihinna, manara yimba Yesusmba waiambmba owai viv? ⁴⁶Wo no tempelduvna polisi unna, himba ishovnamba manam manam mendeklinonoa, sna moamba an eva ishov? ⁴⁷Wo Varisinind opulvona, eva Yesusva yemba ambo daswoteita. ⁴⁸Wo es hevpa kava kuwulva, Varisinindva, kava hembra undnahonam keknam amnavma? owainonoa. ⁴⁹Wo heva os nomba indhanamba, himba temba levrapivolmba owai vivpa lohohmomba, Yesusmangas lovahmanav keknamba. Manara, Sesoava doa ona, himba si indkokla vilovav.

⁵⁰Wo Nikotemusva di doara noi kuwul owalhovra patha-wulvahvna. Himba no indhanarini, nemetva himba gana nonglalmba Yesusmba sinimba. ⁵¹Wo hev unna, si pinamba lohohmorava nisva lesvhoawol vinvramoa, indhanana moamba osva hillimnivavmoa boasnamba. Pivva lelnamba henamba lesvhueivavmoa, heva verava, pioa boasna velokusethivra, mani himba vena? ⁵²Wo hev noi indkumbi opulvona, wo eva yimba Galilirinima, osta Yesus ten? Beswonam yeoa numha vro pevmoa doaraminim tombaimom. Yimba ata levrapivongovav, osva owaita, mongova moashulnindriniva provavmoa Galiliriniva. ⁵³Wo doa nomba indkumbiva os deuvramba bukethungu vena.*

Ungevlirinikoklamba Kevrinamba, Waiambna Yesusindam.

8 ¹Wo heva os Yesusva gana oliv denwit oloram. ²Wo venamba, olingil lihapiavnamba, himba henga gavnamba, siha tempelduvra. Indkumbiva indhanamba provna heindamba, wo himba ovhoanamba, numhowol vevna hembra. ³Wo vena, nonoanind lohohmona eva Varisinind, he dom ungevlirinim mongom tlatrinim pulsaivna, os hembra nunglinamba, tendom pelkomo vevna himba. Kleiha wulanganamba, indkumbi di novlomos wulavnam, di hulvundthue.

⁴Wo hev umnina Yesusm, guru, hona ungevlirinimba kevriva, nonamba mingo tendorini olohlohvna, hevna tlaliva owai. ⁵Wo Mosesna

* (7:53-8:11) Nonoanindva os uv, honamba moamba Yonmba hevpa novol venamoa.

lohohmomba os ona, pivva miklewol vivra ungevlimba honna, nomba temba osva himba vivrava. Wo ye kam wohtrava, kava ata es vivav?

⁶Himba ambo osihminivna honamba, osm verava, ora os Yesusva ov, wo himba no moana waiishuvav wetatmorava hembra. Wo heva os Yesusva mulumbdandna lohvhooanamba, novol vewol vavovna pethasra hevna englapundna. ⁷Himba di mendah sah ovralvohvna Yesusmba. Wo Yesusva phonamba, lohvhoo, wo hev unna, huiva mongova yimba waiolvohvma besalva? Wo henoi ora, ka men besalva indhanariniva lohv, henoisna honoa mioa pipiamnara hona ungevlinrimoa. ⁸Wo Yesusva henga ovhoanamba, pethasra novol vewol vavovna.

⁹Nomba indhanamba moamba Yesusnamba hillinamba, wo himba indakonda vovoha vevna nominiva. Seilmba mundkolalsna miva vovoha vevna, wo osoa ambo noi hev indkumbi. Yesusva di waiana no ungevlinrimba hevho. Himba di lohvena Yesusna novlomossis. ¹⁰Wo Yesusva henga phonamba, osahmana hembra, indkumbiva indhanamba nomba es hevpa, doa gapiaima? Mongova heriniva yemba ishonnima, osva yimba sahonam vevna? ¹¹Wo no ungevlinrimo ophona, owai, mongova kamba ishonnimoa, osva yimba sahonamba vena. Wo Yesus omnana, eva kava owai, yemba osva ishonnnavvmoa. Wo doa yeoa gao, os aembu, sahonamba manam yimba vevra hengava.

Yesusva Wokla Pethanindna.

¹²Simba Yesusva ishunnvna indhanamba henga. Hev unna, ka woklava hona pethanindnamba. Himba nomba kamba pethamnavrava, henomba si sikulmonamba avramoa, himba si avra ambarangas, beswonam nonapopol avm. ¹³Wo heva os Varisinind umnina Yesusmba, yimba pevmba ishovpa, ye mongawa indhana ambo ishov, osva manimani honamba memba tanam. Kava nomba ningvmoa, yimba temba ishovpa.

¹⁴Wo Yesus ophona, lehra kava ishovna honamba kavm, heva os tanam. Kava kavpa nonora lohv, osva kava nomini pronna. Wo eva kava kavpa nonora lohvtta, osva dom no kembellam si kava gavav hengava. Yimba tit viv, osva kava hinimini pronna, wo hem si kava gavav. ¹⁵Yimba indhanamba lesvhoawol viv pethanindna wevsana ambo. Heva os kava kavhova ishonnnavvmoa mongomba, osmba yimba sahonamba vena. ¹⁶Wo heva os kava mongomba lesvhoatava, kana moamba tanam lohvra, manara, eva mani kavhova ishov. Ara noi ten kam wolaihapranam, he kamba waivev.

¹⁷Yena pevna lohohmomba osva unna, nonamba sambla indhanamba novna enonglalva mongawamomba evevrapva, wo yimba uvra, lehra ohov. ¹⁸Kava eva kamomba ishov, heva os ara, ten kam wolaihapranam, hev kamomba ishov, mongawamoa evevra.

¹⁹Wo hev osihminina, hi arapevpa yenamba? Yesus ophona, yimba mendah tit verumbtv kamba, kam eva aram. Wo heva os yimba kamba

lihatava, wo eva yimba osva lihavavta aramba kanamba. ²⁰ Yesusva honamba ishunvna, di hev ten numhowol vevnam tempelmera. Wo himba di lohvhova vevna, nolhra tempelna di ten sungulvnam. Wo heva os owai, an eva englava piata, hembra kevralmba. Noinda hevnamba nambainonoava mendah provnamoa.

**Yesusva Yutanindna Kuwulmba Pepeh Vewol Ovona, Si Maim
Yimba Monamba Kuvhueivav Sena Kembelmonamba.**

²¹ Henga Yesusva unna indhanamba, kava si sandhalangavav yemba. Yimba si kamba aslavlav, wo heva os yemba si dalvra pevna indkoklanahonam. Yimba domba ambvavmoa, kava domba gavavpa. ²² Wo Yutanindva uvna, es hevato, Yesus heva hevm si wukleihavmi? Memba osva, esalm himba oi, yimba domba ambvavmoa, domba kava gavavpa. ²³ Wo Yesus unna, yimba hona indhanamba honamini. Wo heva os kava senamini. Yimba hona petharini, heva os kava hona pethariniva owai.

²⁴ Wo kava yemba os ishunv, yemba si dalvav pevna indkoklanahonam. Tanam yemba si dalvra pevna indkoklanahonam, yimba undnahonamba almba owai vivrava, osva kavpa memba kava.

²⁵ Wo hev umnina, wo an eva yimba? Yesus ophona, kava henoi, ten kav ishunnam yem seilm. ²⁶ Kava esvema wetatmomba ieinv yenamba, heva os owai. Manara, kava ishunv indhanamba nomangas, ten kav hellevnam henonamini, henoi ten kam wolaihapanam. Wo himba tanamangas wohishov.

²⁷ Indhanamba beswonamba levrapivolvnamoa nomba, osva ovna, Yesusva ishunv kamba aralmom. ²⁸ Wo hev unna, yimba si wukleihavav arana ombolmba. Wo yimba nonam si nunglivav, osva kava he lohvna. Yimba si nunglivav, osva honamba manimani memba kava vevnamba, kavna nengavnangnamba owai. Yimba si lihevav, osva kava ishov nomangas, ten ara ishomnanam kam. ²⁹ Wo himba nomba temba kamba wolaihapanamba, himba kamba nihra vrev. Kava elsusva vev nongas, osm noinda he und lothovra. Wo noinda osva himba kamba nombolvhoavmoa. ³⁰ Honamba osva Yesusva ona ishunna, indhanamba mindnam hembra undnahonam lovahthamnavna.

Moanonoara Si Indhanamba Amanamana Vevra Windewonamba.

³¹ Wo Yesusva ishunvna nom Yutanindm, he noi ten lovahthamnavnam hem, unna, yimba osangasva wohengivrava kana moamba, yimba osva wohavra kavtindinonowolm. ³² Wo yimba si os levrapivolvav moanonoamba. Wo no moara si yemba beswonamba vewol vevra windewonamba. ³³ Wo Yutanind opulvona, kava memba Aprahamna towandal av. Kava doava anamoa doarava ombandhana andranindilmba. Wo esalm yimba memba osva oi, yimba si windewonam avra?

³⁴Wo Yesus henga ophona, kava yemba ishunv tanam. Indkumbiva himba nomba temba avpa hevna indkoklanahonamba, himba nomba temba av indkoklana andranindilm. ³⁵Ombandhana andranindriva eukwonamba deuvrava eivvmoa hevtindimongova, heva os ombolva hevtindina yunaln. ³⁶Wo noinda osva Sesoana ombolva yemba kilumbshuawol vetava pevna indkoklanaminiva, wo osva yimba si avav windewonamangas.

³⁷Kava nonora lohv, yimba Aprahamna towandal av. Wo heva os yimba kamba helvakomandhalm viv, noinda kanamba moamba siheinvmoa yena undrava. ³⁸Kava ishunv yemba, nom ten ara kavna kam nov wolaihamnanam. Wo heva os yimba viwul vevna nongas, ten pevna arapev pevm ishunvnam.

³⁹Wo hev opulvona, simbemba kanamba luhunna Apraham. Wo Yesus unna, yimba tanamba Aprahamtindiva atava, yimba ata manimani vivta, nomba temba Aprahamba vevnamba, noinda himba Sesoam tanamba lohmanavna keknamba undnahonamba. ⁴⁰Kava no indhanarini, kava tanam yemba ishunv, nomba kava hellenamba Sesoanaminiva. Wo heva os owai, yimba kamba helvakomandhalm viv. Heva os owai, Aprahamba osva vevnamoa. ⁴¹Wo manimani memba yimba vivpa, yimba os viwul viv, ten pevna arapev vevnam.

Wo heva os Yutanind opulvona, kava snamba avmoa, timingrinimsnamba. Sesoaralva kanamba einv. Hengas aramba luhunv kanamba. ⁴²Wo Yesus unna, owai, Sesoava aralva luhuntava tanamba yenamba, eva yimba ata kamba und vivta. Manara, kava prona Sesoanadini, veiva, men hui av kava daipotava. Kava pronamoa kavna undnamba, Sesoaralva haprana kamba. ⁴³Yimba beswonamba levrapivolvmoa nomba moamba, temba kava ishovpa, manara, yimba avmoa kana moanamba.

⁴⁴Yenamba arapevpa luhunna Setan. Wo yimba hena av, wo yimba ningv nomangas velmba, he nom nengvm. Himba doaramini wohlohna, indhanamba helvakomo velmba. Himba ovunna, beswonamba almba, manara, sna undva heindava lohvnamo. Himba nomba moakokomomba ishunvpa, wo himba hevpa snal noi moakokomoa, hev ten ishovm. Wo himba hevm moakokomona aral vilov. ⁴⁵Wo heva os kava ishov tanam. Wo osva yimba noinda kana moamba kek vithivmoa. ⁴⁶Wo yimba mongova osva nonglavma, kava sahonam vevna, a? Kava tanamba ishov, wo noinda manara eva yimba kamba amnamba owai venavna undnahonamba, a? ⁴⁷Himba nomba Sesoanamba, wo himba nomba Sesoana moamba hellev, kek vethav. Wo heva os yimba hellevmoa, nomba temba Sesoava ishovpa, manara, yimba avmoa Sesoanamba.

Yesus Kuvhoav Apraham.

⁴⁸Wo Yutanind opulvona louwolm, kava os uv, yimba Samaritanindrini lohv. Kava os uv, tihsongova doa yena nihmerava sihana, wo heno

yemba wuhho ovrav. Wo es hevpa tanamma, a? ⁴⁹Wo Yesus ophona, tihsongova mongova avmoa kana nihmerava. Kava kavna arana nihilmangas okolomana vev, wo heva os yimba kamba pethambroora opelpetha uvmona vev louwolm.

⁵⁰Heva os kava eva nengvmoata, andra velmba, kavna nihilmba noindamba popeng vrelmba. Manara, ten mongo lohv, henoi nengv, kana nihilmba wivelm. Wo hev kamba lesvhoav, osva ora kava indhanarini windel lohv. ⁵¹Kava ishunv yemba tanam. Himba nomba kana moamba engvrava, hem nomba si dahavramoa.

⁵²Wo Yutanind umnina Yesusm, daipota doa kava levrapiei, osva tihsongova av yena nihmerava. Doa vena, Apraham dahana, moashulnindm dalna. Wo heva os yimba os oi, himba nomba kana moamba engivrava, si hem nomba dalvramo. ⁵³Wo yimba os nengvma, ka mendekliva, ka wohkuvhoav Aprahamba, a? Wo doa vena, Apraham dahana, eva moashulnindm dalpiana, wo yimba an hevpa eva, a?

⁵⁴Wo Yesus ophona, kava kavmba okolatava, nomba okolalva kanamba kava ombam ambo opelthavra. Heva os mongo kana nihilmba wivev, Sesoa aral, hona indhanariniangas, temba yimba olvohvpa, memba kana Sesoangas. ⁵⁵Wo heva os yimba beswonamba lihevmoa hembra. Kava kavpa lihav hembra. Wo kava osva otava, kava tit venav hembra, wo osva kava moam kokovav, os ye ten uvm. Heva os kava kavpa lihav hembra, wo kava wohengv, nomba himba temba ishovpa. ⁵⁶Pinamba simbemba Aprahamba indk vethana, osra himba si nonglavav kana nambaimba. Himba doa kanamba nambaimba nonglana, wo himba doa indk vethana.

⁵⁷Wo Yutanind umnina, a es yimba ov? Owai, yimba henanam eva ata nonglata Aprahamba, yimba mendah, ⁵⁰pelarava tahonmba yenamba lohvnamoa? ⁵⁸Yesus ophona, kava ishunv yemba tanam, Aprahamba avalva sism lengna, kava doara doa avna. Manara kava kavpa men.

⁵⁹Nonamba Yesusva honamba ona ishona, indhanamba honmba ovravna, heindam dom pipi veihemb velm, una, himba hevmba opusvundthovna, os ovna, kava Sesoa lohv. Heva os Yesusva nominiva koho lohvhonamba, wo os himba pholahangana no tempelliniva.

Yesusva Sishona Vrena Novtitmungilm, Nom

Aval Doara Ten Ambo Snal Lengnam.

9 ¹Yesusva monam ona gana, nongla indhanarinim novtitmungilm, nom aval doara ten ambo snal lengnam. ²Hevtindi noi 12pelara osihminina, an indkoklava venamba, hona indhanariniva noinda novtitnahonamba lengna, hev venami, a aralaval evenami?

³Yesus opla vrinna, hona indhanarinina aral avalna indkoklarava owai, himba novtit venamo. Hona indhanariniva, avalva novtitmungil wohlengna, osm ata Sesoana keknasowolva honinda, osm si indkumbiva

nunglutithoavra heinda. ⁴Hillu, mendah upsil lohv, pioa nihnapehna vrivei hena nona andramoa, himba temba kamba wolaihapanamba. Noinda doa simba murapeta ihprakav, wo an eva andra vevra sinimba? ⁵Kava huiva avrava petharava mendahva, ka upsilva hona pethariniva luhunv yemba.

⁶Honamba doa Yesusva ishopianamba, doa hev muemb topholothonamba, pethambrowolm nona weisvre. Wo venamba, nona novm sanbas vrowolmana no indhanarinina. ⁷Wo hev omnana no indhanarinim, garava, Siloam tovalpra pora daloho. Wo no indhanariniva os gana, poramba daloholmba. Wo himba poriniva hengava provnamba, himba doa beswonam henga nov vilprovna. Nomba pomba osm alvna, Doa Wolaihangav.

⁸Monglava indhanamba nunglivnamba hona indhanarinimba, temba doarava kekamnakrava wulongo lohvnamba. He eva no indhanarinina owal una, nunglu, es hevpa no indhanarinima, ten kekamnakra wulongolohvnam? ⁹Mongla opulvona, hevta hev noi. Wo heva os mongla uvna, owai, himba nomba owai. Heva os himba snalta eva lohv. Wo venamba, no indhanarini hev onam, kava menta. ¹⁰Wo hev umnina, es yimba vei? Manana vei yimba pevna novmba?

¹¹Hev unna, indhanarini henamba nihilva os alv, Yesus, petha weis vreiva, kana novm nona sanbas vrowoli. Wo kamba omna, garava, Siloam tovalpra di daloho. Wo kava gaiva, di dalohkai, wo kava os henga beswonam wohnovvei. ¹²Wo hev sah ovrivna, wo no indhanariniva es vei? Wo no indhanarini unna, kava eva tit venavta.

Varisinindva Sah Ovrivna, Nom Yesus Ten Sishona Vrenam.

¹³Wo indhanamba nomba vinamba, os waianginna Varisinindinamba, hem nomba temba Yesusva hembra sishona vrenamba. ¹⁴No nambainamba, Yesusva temba pethava weisvrenamba, wo hena novm nona pevhoawolmana nona, nonam vena, Yutanindnamba vah iaevul okomba luhunvna nonamba. ¹⁵Wo doa Varisinindva sah ovruwul vevna no indhanarinimba, umnina, es yemba venai pevna novmba? Hev unna, himba pethambrona sanbas vrowoli kana novmba. Wo kava pora dalohoiva, os kava novpa pevhoawolei hengava.

¹⁶Monglava Varisinindva os eishovna, hona indhanariniva osvva nenglohvmoa, ov, memba vah iaevul okomba owai, wo noinda pivva lihev osvva himba pronamoa Sesoanaminiva. Mongla uvna, heva os indhanariniva indhanarinikoklava atava, osvva mendekliandrava vevramoa, memba honamba himba vevpa. Wo noinda osvva mongawamomba owalmongova eukvrivnamoa owai. ¹⁷Wo henga osihminina no indhanarinim, es yimba nengmanav no indhanarinimba, yena novmba himba temba pevhoawoliva? Wo no indhanarini unna, himba mongo moashulnindrini.

¹⁸Wo heva os owai, Yutanindna kuwulva nomba moamba hillinamoa, osva ona, lehra ov, himba doara novtit vevna, wo heva os himba doa henga beswonam novvev. Wo doa himba vinamba, indhanam monglam wolanga vina, no novtitmungilna aralavalm onhalvunilm. ¹⁹Wo hev sahinna, es hevpa memba yena ombol luhunvma? Yimba es ohov, hembra ambo doara snal novtitmungil lingnama? Wo es hevpa eva himba novvev daipotava hengava?

²⁰Aralaval uhunna, kava enonglav, osva memba kana ombol luhunv, wo kav vei, elihav, osva hembra doara snal lingna novtitmungil. ²¹Wo heva os kava tit evev, es himba hengava novpa vev. Kava tit evev, an dihi henamba novpa pevhoawoli. Osihminu hevm. Himba mani eusilma, hev ata yemba ishunvav. ²²Honamba moamba aral avalva noinda ihishovna, himba pem evinvna Yutanindna kuwulnapenam. Manara, kuwulva doara doa osva ningna, himba nomba osva otava, Yesusva Kristus, hem nomba ata os wolaihapulvovav sembayangduvriniva. ²³Noinda aralavalva sna moamba osva ihishovna, himba mani eusilma, osihminu hevm.

²⁴Wo henga Yutanindna kuwulva umnina, nom ten novtitnahonam aval lengnam. Hev umnina, yeoa okolavm Sesoamoa, wo os kamba ishunu tanamolnam. Kava os ningv, no indhanariniva indhanarinikokla. ²⁵Hev unna, kava eva tit venavta, osva ora himba indhanarinikokla lohv. Wo heva os mana vemamba kava nonora. Kava seilmba avna novtitna, wo daipotava doa kava novvev.

²⁶Wo no Yutanindna kuwul umnina, mani venei himba yemba? Es venei himba yemba, hengamba novvelmba beswonamba? ²⁷Hev ophona, kava doa doara yemba ishuni osva. Wo heva os owai, yimba hillimoa kamba. Manaram yimba hengava hevpa hellelmba uv honamba? Wo es hevpa yimba lovahalm uvma hetindilm? ²⁸Wo moalusna di alalkoho esvema hembra, umnina, yimba hetindirini, kava memba Mosestindi av. ²⁹Kava nonora lovahv, osva Sesoa ishumnana Mosesmba, wo heva os kava owaimomolmba levrapivolvmoa no indhanarinimba, osva himba hinimini prona.

³⁰Wo hev ophona, memba ambo yimba sahonam eishov titnam. Yimba tit viv, osva himba hinimini prona, wo heva os himba pevhoawoli kanamba novpa. ³¹Pivva indkumbiva nonora av, osva Sesoava helwolvmoa indhanakoklamba. Heva os Sesoava helwolv, nom ten vev, sembayang viniy, eva engivm hevm. ³²Monglava doarava sna moamba ishumnivnamoa, hillinamoa, indhanariniva nov velmba, snamba temba doarava avalva lengnamba snamba. ³³Wo hona indhanariniva Sesoanaminiva lohmba owai vetava, ata himba vevtamoa mana vemava snamba.

³⁴Wo hev louwolm umnina, yemba avapevpa lengna indkoklanahonam. Wo es hevpa yimba ambo kam numhowolalm ovma? Wo hev opulvona, wohpholahangao, manam hengava yimba sihavav homba.

**Hindva Nomba Keknamba Temba Undnahonamba
Amba Owai Vivpa, Himba Novtitmungilmsna Av.**

³⁵ Yesusva hellena, osva himba doa engvawul vei hembra nominiva. Wo doa Yesusva hembra silelnamba, omnana, es hevpa yimba keknamb undnahonamb lohmanavma arana ombolmba? ³⁶ Hev omnana, mendekli, an ombolva aranamba? Ishomno kam, wo osva kava hembra keknamba undnahonamba lohmanavra. ³⁷ Yesus omnana hembra, yimba doara doa nonglana hembra. Arana ombolva, men yemba moamba waiishov daipota. ³⁸ Hev omnana, tanam, kava keknamb undnahonamb lohv. Wo hev mulumbdandna lohvhooamnanamba, okolvavna Yesusm.

³⁹ Yesus omnana, kava sihapra vena hona petharamba, osm pethanindmba lesvhoawolalmba. Kava prona, osm novtitmungilva henga beswonamb novpa vivra, wo himba nomba memba beswonamba nov vivpa, himba henga novtitmungil avra. ⁴⁰ Monglava Varisinindva di doara lovahvna murapeta Yesusinda. Nonamba himba nomba osva ona hillina, hev umnina, yimba kamba os unima, yimba novtitmungil eva avta a? ⁴¹ Yesus unna, yimba osva utava, kava indhanakokla av, osrava si Sesoava yemba unvavmoa, osm yimba indkokla vina doa. Heva os daipotava yimba os uv, kava wuvol indhana av, novviv beswonamb, wo noinda osva Sesoava si yemba os unvav, yimba indkokla vina doa.

Yesusva Besal Kekalvhonindrini Sipsipnamba.

10 ¹ Yesusva os ona, tanam kava ishunv yemba, indhanariniva vovgavavmoa tuvsharava sipsipna ninvhoramba, heva os himba vovgavav mongnashara indanam, sna indhanariniva temba yukovindrini. ² Himba nomba diva tuvsharava sihavrava, temba himba nomba sipsipna kekalvhonindrini. ³ Wo indhanariniva nomba tuvpa kekalvho vrovovrava, hembra velaihamnavra tuvpa. Wo sipsippa hillimnivra moalamangmba no kekalvhonindrininamba. Himba wonewol vevra hevna sipsipmba, nihilm indakondakonda sevelunvra, wo os himba deisumbi lohmana vevra hembra.

⁴ Wo himba os wonphovrava, os wonlohmana vevra. Wo hev ku mi wulluhunvrava, os deisumbi lohmana vevra. Himba engingivra, manara, himba hillimniv kekalvhonindrini moalamangmba. ⁵ Wo heva os himba mongomba indhanarinimba patvmonavavmoa. Himba pilialowolavav henaminiva, noinda himba hillimnivmoa hena moalamangmba. ⁶ Yesusva honi ishunna moamba indhanamba, wo heva os himba levravivolnamoa honamba moamba temurava.

⁷ Wo henga Yesusva unna, kava ishunv yemba tanam. Ka tuvmsna sipsipnamba luhunv, ninvhomba. ⁸ Indkumbiva indhanamba temba miva doarava prwonamba, vevna, yukovniv, eva allambawonda. Wo sipsippa

hilwilvnamoa hembra. ⁹Ka tuvpa. Indhanariniva himba nomba kaindava sihavrava, hembra si lopshavav. Himba si beswonam vevra, sihavra, phovra, innemba silelalmba. ¹⁰Yukovnindriniva prov, vev, yukov velm, eva indkokla vewolalm. Heva os kava prov, daswolalm undm, eva osm wohlundthoara undngas.

¹¹Kava besal kekalvhonindrini. Besal kekalvhonindriniiva hevmba wirehunv, daheinilm sipsipm. ¹²Andranindriniiva, nomba temba diva dambroh velvohvpa, sipsip andrarava, temba indanapetam no kekalvhonindriniiva, hembra temba dahwol vevpa. Wo nomba andranindriniiva nonglatava allambawondamba, osva ora, ten prov, himba dandwonam wohgavav, bumbrishahangavav sipsipmba di. Wo doa allambawondava os kelvhueindava, engalungu vevra, wo os sipsippa bukithengu vevra. ¹³Indhanariniva dandwonam wohgana, noinda himba di andranindrini ambo. Himba undnahonamba andra vevnamoa, sipsipmba kekalvho vewolalmba.

¹⁴⁻¹⁵Kava besal sipsipna kekalvhonindrini. Kava lihawol vev kavna sipsipmba, os ten ara kam lihavm. Wo eva kana sipsippa kamba kavmba lihevavta. Kava kavmba wirehunv, daheinilm kavna sipsipm. ¹⁶Wo kanamba monglava sipsippa lovahv, heva os hona pueilmerava owai huiva. Wo kaoa hemoa wonproita eva. Himba si eva hillivrata kana moalamangmba, wo osva si lohvav, mongal sipsiptindiva, mongal kekalvhonindrini.

¹⁷Aramba mindnam kamba und vev, noinda kava kavmba wirehunv, dahalm. Kava kavm wirehunv, dahalm, osm kava si hengava beswonam kavna nihnama avav. ¹⁸An eva kamba si helvakomandhavav? Kava yunalm kavmba wohwirehunv moahui. Kamba an eva ovomnavav owai, wo eva kava hengava kavna nihnama avrava, an eva kamba ovomnavav? Honamba memba, aramba kamba os omnana velmba.

¹⁹Henga Yutanindva owai, owalmongova mongawamomba eukvrivnamoa, noinda hona moa, snal Yesus ten ishovnam. ²⁰Indkumbiva himba os uvna, tihsongova doa sihamnana nihmera, wo noinda hembra daielmba ovomnav. Manara hilliv yimba hembra. ²¹Heva os mongla uvna, indhanariniva nomba temba daiva venavpa tihsongonamba, osva ishovmoa sna moamba. Wo es hevpa tihsongova pevhoawol vinvrama novtitmungilna novmba?

Yutanindva Waialhuvna Yesusmba.

²²Wo doa inetihva mendekli phunvna Yerusalemrava. Nom seilminim henga nengvhueinam, lehalm devm, os memba Sesoa tempelduvnonoa. Memba nonam vivna, namvuvi hulvui iavnam. ²³Yesusva di lohmana vevna tempelmera Solomonna plasangsis. ²⁴Wo Yutanindva hembra kusomnanamba, hev umnina, eva mani om yimba

phonama, kamba wera vewolalmba pevindava. Yimba tanamba Kristusva lohtava, wo eva os ishunuta musera kamo.

²⁵Yesus ophona, kava ishunna yemba doa doara, wo heva os yimba kek vithinamo. Osva kava memba mendekliandrava vevpa arana nihilla. Wo noi mendekliandra kamba museramba holvonethav, osvav kava men. ²⁶Wo heva os yimba owai, mendah tit viv, manara noinda yimba kana sipsippa owai. ²⁷Kanamba sipsippa aong velvohv kana moalamangmba. Kava lihawol vev hembra, wo himba kamba wohengpetv. ²⁸Kava daswolv undva, yunalnm nonapopolm wohalm, wo hembra si dalvramoa. Wo mongova indhanariniva hembra yukov vevavmoa kana englariniva. ²⁹Ara kana kamba holvorombraohna sipsipmba. Himba manana manana mendekli woheinv, wo an eva mongova yukov vevav kanamba sipsippa kana arana englariniva. ³⁰Kava araiva mongawundna mongal ahav.

³¹Wo henga Yutanind hon di ovre, Yesusm nonam miklelm. ³²Wo heva os Yesus unna, kava doa vewol vena mendekliandrava besal aranaminiva. Wo heninda yimba kamba miklelmba viv?

³³Wo Yutanind opulvona, kava miklelmba vivmoa yemba, noindava memba besal andrava yimba venamba. Heva os ten pev ishomnavna sahonam Sesoam. Yimba ambo mongo indhanarininonoa, wo heva os yimba os oi, kava lohohra, os Sesoa ten avm.

³⁴Wo henga Yesus ophona, ten novol veluhunv pevna lohohmora, osvav Sesoava os ona, yimba Sesoamsna av. ³⁵Honamba tombaimomba hembra os nengsmoa ov, yimba Sesoamsna av, indhanamba, henom Sesoava hevna moamba ishunna. Wo no tombaimomba gekalava ishovmoa.

³⁶Kava memba noi, Sesoa kamba pusvundthoana hevelm, wo wolaihaprana petharam. Wo manara yimba osvav uvna, kava sahonam ishomnavna Sesoamba, noinda kava osvav oi, kava Sesoana ombol? ³⁷Kava nomba owai vetava, temba aramba vevpa, wo osvav manam yimba kamba keknamba amnavra undnahonamba. ³⁸Heva os kava vetava, osvav temba aramba vevpa, eva yimba kamba keknamba amba owai venatava, nom ningvm, ten kav vewol vevm mendekliandrava. Wo yimba osvav levrapivolvav, osvav aramba kana nihra av, eva kava arana nihmera av. ³⁹Wo henga Yutanindva kevrilm vivna Yesusmba, heva os himba hoai vinna henaminiva.

⁴⁰Wo doa Yesusva os gana, Yotan pom lovongo venamba, dom gavna, ten Yon Baptais nemet pona poswol vawonam. Yesusva di avna, ⁴¹wo dom indhanamba esvemava provna heindamba. Hev una, Yonmba mendekliandrava osvav vevnamoa. Heva os manam manam, Yonmba memba ishomnavnamba hona indhanarinimba, tanam. ⁴²Wo no kembellava mindnam lovahthapramnana keknamba undnahonamba Yesusmba.

Lasarusmba Dahana.

11 ¹Mongo tendorini lohvna, nihilva henamba Lasarus, wo hembra uvavulm dihelvna. Himba di avna Betani kembella, di ten ahavna

muskovol sambla Mariai Martai. ²Mariava no ungevlirini, dawonamba he si welsandava sovhomnavav mendeklimba, wo hevna tana sowol venavav. Mariana muskovolva Lasarus lohvna, wo doa hembra daipotava uvavulm dihelvna. ³Wo Mariaiva Martaiva evenamba, mongom ewulihanga, ishonnalm Yesusm, omnana, nomba sehpevpa, yimba temba hembra mindnamba und velohvpa, uvavulm dihelv.

⁴Wo nomba Yesusva ona hellena, hev unna, nomba uvavulva temba venavpa, osm hembra wohdahavavmoa. Temba ambo osm, indhanamba nunglivra pusambakambam Sesoanam, wo nihilm wulovolmanavra. Eva honamba memba osm temba vei, popeng vrelm Sesoana ombolm. ⁵Yesusva mindnam und vewol vevna Martam, hevna moasalalm, eva Lasarusm. ⁶Wo heva os nonamba himba osva hellenamba, ona, Lasarusva uvavulm dihelv, himba diva henga dawonam samblanin vewolna.

⁷Wo doa Yesus unna hevtindim, henga angalohra Yutia provinsram. ⁸Wo hevtindi una, heva os Yutanindva diva yemba honnam helvakomandhalm vivna. Mani doarama, owai. Wo yimba hengam dom galm ov? ⁹Wo henga Yesus opla vrinna, owai, eneha ata ye andram nongthovav, mendah nambaiva lohv. Mongova indhanariniva lohmana vetava okombanamba, hembra lomostat vepevavmoa, manara noinda himba nonglav hona woklamba petharinimba. ¹⁰Wo heva os mongova lohmana vetava sinimba, hembra lomostat vepevav, manara noinda manakambara eva ata himba nov vevta. ¹¹Honamba Yesusva ishopianamba, wo henga hev unna, pina sehelva Lasarusva ninpol kovopei ambo. Heva os kava gav domba, deuhvholm ninmerinim.

¹²Wo hevtindi umnina, heva os himba ninmba litava, osva henamba uvavulva hembra si wuleihavav. ¹³Yesusva osm unvna, doa Lasarusmba dahana. Heva os hevtindiva os ningvna, Yesusva ambo ov, osva Lasarusva ninpol kovopei. ¹⁴Wo doa Yesusva moakus unvna, unna, Lasarusmba doa dahana. ¹⁵Heva os kava yem ninginv, eva ka vei, indk vethav, osva kava heiva mongawulmba ahanamo. Manara, noinda ata yimba kamba undnahonamba wohlovahthamnavav mindnam honindava. Wo doa pioa angavai heindam daipota. ¹⁶Yesusva ishopianamba, wo doa Tomas, mongova henamba nihilva Ditimus, hev unna owalm, pioa angavaita, pimba si dalvra hemongo.

Yesusva Ona, Phona Plalva, Kava Men Kav Lohv.

¹⁷Yesusva phonamba Betanira. Di himba hellevna, osva Lasarusmba doa dahana, wo honmerava os vindilna, 4pelara okombava lohmanana. ¹⁸Betaniva mani ehallama, ambo lohvna murapeta Yerusalemrava, 3pelara kilomita ambo. ¹⁹Wo noinda osva Yutanindva esvema pulningewolvna Mariaimba Martaimba, osm noinda undwonam ahavra, doa daheinna henamba muskovolmba.

²⁰Martava helle, ona, Yesusva doa di prov, wo himba deuvriniva venamba, monaram gavna, suwihalm Yesusm. Mariaoa di ana deuvra. ²¹Marta omnana Yesusm, doarava yimba huiva atava, kana muskovolmba ata dahatamoa. ²²Heva os kava nonora av, osva eva daipotava yimba sahmanatava mana vemamba Sesoamba, yemba vraohvav.

²³Yesus omnana, yenamba muskopevpa si phovav, wo henga si beswonam avav. ²⁴Marta ophona, kava nonora, osva himba si henga phovav, nonam ovi pethai hoai evewolvram, nonamba Sesoava nambavrava.

²⁵Yesus omnana Martam, phona plalva, kava men kav lohv. Himba nomba temba kamba keknamba undnahonamba lovahthamnavpa, himba si yunalm wohavra, eva hembra dalvra. ²⁶Wo hindva nomba memba avpa, himba keknamba kamba lovahthamnavrava, si hembra dalvramoa. Marta, yimba keknam nengvma honamba? ²⁷Marta ophona, kava keknam amnav honamba, osra yimba Kristus, Sesoana ombol. Yimba noi, ten hom pronam hona petharam.

Yesusva Lasarusm Wivevna.

²⁸Martava osva ishopianamba honamba, hev ganamba, omnana moasalalm Mariam dendwolla, protok. Doa pina guruva men einv, wo himba yemba osahei. ²⁹Nomba Mariava ona osva hellena, himba phonamba lelnam, os wohgana Yesusindamba. ³⁰Yesusva mendah sihapra vevnamoa kembellamba. Himba mendah di vevna, ten Marta nonglaphonam monara. ³¹Yutanindva waiaevulvna Mariamba di deuvmora silembakombam. Yutanindva nunglivna, doa lelnam wohpho, wo himba osoa wohpatvmonavna hembra. Himba os ningna, Mariava gav pokamaram dom, wenam owolm. ³²Heva os Mariava dom gavna, di ten Yesus avnam. Nonamba Mariava ona nonglana hembra, vendpenamba Yesusna monglasra, hev omnana, yimba doarava huiva atava, ata kana muskovmamba dahatamoa osva.

³³Yesusva nonglana, Mariava wivev, wo eva Yutanindva nomba nungwulimbna, himba eva wuovnata. Wo Yesusva eva wosava innemolla lohna, wo himba eva wivelm vevnata. ³⁴Hev osihinna, hi yimba singvina hembra? Hev umnina, prorava, nonglo. ³⁵Yesusva wem osevrvana. ³⁶Wo Yutanindva una, nunglu, eva mani eskandma, himba mindnam hevm und vev hembra. ³⁷Wo mongla una, Yesusva novtitmungilm sishona vewol vena doa, wo himba nov viv, wo eva eselm himba hona indhanarinimba kolvramba owai vena, osmba ata homeis hem dahavm?

Yesusva Henga Wolaihaphona Pokamarini Lasarusmba.

³⁸Yesusmba wavrava mendekli snal venavna i. Hev provna pokamaramba. Pokamava nomba honme mendekli, wo henga mongo

hon velapathalohvna no mengallava. ³⁹Yesus unna, kihliheiu honm ehallam. Marta omnana, heva os mendekli, doa 4pelara simba penngiliha vungana, hembra os dahana. Ata nungva sahoklal vevav. Martava Lasarusmindna muskovolnonoa. ⁴⁰Wo hembra Yesusva omnana, doa yemba kava seilm ten ishomni, yimba kamba amnatava keknamba, ata yimba nonglavav pusambava Sesoanamba.

⁴¹Wo doa himba os tuvriniva honmba kihliheina, wo Yesusva nov vevongo venamba, hev ona, ara, kava yemba os omnav, yimba lehra, yimba doa kamba hellei. ⁴²Kava nonora lohv, osva yimba elsus kamba hellellohv. Heva os kava ov honamba, noinda indhana, men doa kamba pulningei. Kava vinv osm hembra, heoa levrapietra honamo, osra yepev kamba wolaihaprana.

⁴³Yesusva honamba osva ishopianamba, hev mindnam vevandnam onam, Lasarus, pholahangao. ⁴⁴Wo no mindva os wohphona, doara ten ninginam kayenna, nonahonam wohphona, eva novlomsm nom ningimnam. Yesus unna, selvowol vinirava kayenmoa, os nis gara.

Kuwulna Mundilnamba Moa Mokeltheivna, Yesusm Helvakomandhalm.

⁴⁵Nomba Yutanindva, temba waiaevulalm prowonamba Mariamba, nunglina, ona, os vev Yesusva. Wo mindnam himba keknam lovahthamnavna hembra. ⁴⁶Heva os monglava Yutanindva anginvna Varisinindam. Anganamba, nom temura ishunvna Varisinindm himba, ten Yesus venam. ⁴⁷Wo doa vena, sembayang andranindna kuwul, eva Varisinind, himba moamba wulvahvna, kusopho velm, moam ishunilm nom kuwulm. Hev una, si pimba es vivav? Hona indhanariniva mindnam mendekliandrava vewol vev. ⁴⁸Pimba hembra nombolvhueitava, os ora, hvaomanakavra honamba manimani osva, indkumbiva si hembra tovpethamnavav, keknam undnahonam alm. Wo Romnindva si ambrava, pina tempelduvmba muehvinav pivnahonam.

⁴⁹Mongova indhanariniva di doara avna, nihilva henamba Kaiapas. He no tahonnamba sembayang andranindna kuwulva luhunvna. Kaiapas unna, yimba hona indhanamba memba owai, mana vemamba levrapiolvmoa. ⁵⁰Temba lehra, osva mongawa indhanarinim ambo daheinvav indkumbimba, si homeis indkumbim indkokla vilovm. Heva os yimba levrapiolvnamao honamba beswonamba.

⁵¹Kaiapasva honamba moamba hevna nengavnangnamba ishovnamao owai. Noinda osva ishovna, himba nonamba sembayang andranindna kuwul wulluhunvna no tahonnamba. Wo osva himba no moamba ishunvna, osva Yesusmba si daheinvav, Yutanindmba kolvrowolalmba, ⁵²eva indkumbim Sesoana towandalm, nom ten pethara vavawonam eungu vevm, osm si os himba mongawa moshrava kilihavav.

⁵³Wo no okombanamba Yutanindna kuwulna mundilnamba doa moamba mokeltheivna, helvakomandhalmba Yesusmba. ⁵⁴Wo doa

Yesusva owai, bambanam muserava Yutanindrava lohmana vevnamoa. Himba nominiva venamba, os gana mongnavhoram dom murapetam sahal petharam. Himba gana mongona kembellam, os ningthiv Evraim, wo di wonavna hevtindimba.

⁵⁵Pasovatihva murapeta phunvna, nom nengewuvulm, Sesoa ten Israelnindm wonphonam. Indkumbiva no kembellini, no kembellini, os provna Yerusalemba no tihrama. Himba angavna, hevme vendwolaihawolalm, osm ora, kakowa lehrangas Sesoana novrava av. ⁵⁶Wo doa indhanamba etapewulungu vevna Yesusmba. Himba di tempelduvra lovahthavnamba, asahmana ungu vevna owalm, es hevpa himba provma hona tihrama? Es yimba ningwul vev? ⁵⁷Heva os doa vena, sembayang andranindna kuwul, eva Varisinind doa moamba vivrina heindamba. Hev una, os himba nomba nonorava lohtava, osva ora, ten Yesusva nolhra, heoa ishunda kamo. Wo himba osva ata beswonam hembra kevrivav.

Yesusva Sehelm Innemba Wonnena Betanira.

Matu 26:6-13, Mak 14:3-9

12 ¹Minguva mongal mendah lohvna, tihva si os ophovav, Pasovatihva. Yesusva gavna Betani kembellam, dom ten Lasarus avnam. Lasarusva noi, ten Yesus pokamarini wolaihaphonam mindil.

²Wo di himba innemba waihlana Yesusmba, Martava inne leswol vevna. Lasarus hev noi innemba waihlana Yesusmba. ³Maria welsanda longve, nomba diva os lohmanavna i, wo himba selvowol vevna Yesusna monglamba nona, wo poswol venavna henga hevna tana, hivhoalmba. Wo nomba teihnungva besalva deuvmorava ambo ningiwulvna.

⁴Yutas Iskariot, mongo Yesustindirini, himba di avnata eva. Himba noi, sewonamba he si Yesusmba holvorahunvav ungrundmba. Yutas ona, ⁵honamba welsandava diva mara os lohmanavna K300. Ata eva mama dinasvom indhanam vrahunta, wo diva nomba innehuinindm moang vinvta. ⁶Wo heva os Yutasva ambo dasalm ovna, himba keknamba ninginvnamoa innehuinindmba. Himba ishovna honamba, noinda himba hevpa yukovol lohvna. He disumbva sunguwulavna, wo himba nomini yukov velohvna diva.

⁷Yesus ophona, aembu, hemoa ambo novangas sihavra. Himba lehra temba vev, hona welsandamba lungulamana vena khui, veiva, daipota men, kanamba nihmba kokolma vrelmba, singvelmba sewonam lehei.

⁸Innehuinindva si elsus yemba pulningewuvmona vevra, wo heva os yimba kamba si elsusva waieuvmona vevramoa.

⁹Indkumbiva Yutanindva ahalovna, osva ona, doa men Yesusva av Betanira, wo doa himba provna heindamba. Wo heva os himba Yesusmangasmba nonglalmba ambvnamoa. Owai, himba nonora

lovahvna, una, nemetva Yesusva wolaihaphona pokamarini Lasarusmba, wo himba eva nonglalm vivnata Lasarusmba. ¹⁰Wo nonawusra sembayang andranindna kuwulva moamba vivrivna, helvakomandhalmba Lasarusmba evata, ¹¹manara, Lasarusm nunglinam hevna novna, wo noinda indkumbiva Yutanindva henaminiva anginva, Yesusmangas keknamba tovopethamnavna.

Yesusva King Kuwulmsna Sihana Yerusalemrava.

Matiu 21:1-11, Mak 11:1-11, Luk 19:28-40

¹²Mongnasiva indhanamba plombmsnamba diva livnamba Yerusalem, ahalona, ona, doa ten Yesusva prov domba. Hind noi, ten prowonam Pasovatihram. ¹³Wo himba naiti manimani noi vrvanamba, nona kangawonga vruwulangavna, nonam suwihalm Yesusm monaram. Hev dandwonam opelpanganam,

Hosana, okulu Sesoam. Sesoa awothov hembra, himba memba provpa mendeklina nihillava. Sesoa awotho pina Israelnindna king kuwulmoa.

Buk Song 118:25-26

¹⁴Yesusva omnanamba, donkiva nosra gana. Doaramini Sesoana tombaimorava os novol velohv,

¹⁵Ata ye pem vivav Yerusalemnind. Yenamba king kuwulva ten prunv. Himba donki bimbella ovhoana, nosra prov.

Sekaraia 9:9

¹⁶Seilmba hevtindiva tit vivna hona moana plalmba. Heva os venamba, Yesusva phonamba pokamariniva, nonamba Sesoava hevna pusambanakambara hembra desvhoana, wo himba henga ningna, osva honamba novol velohmanav hembra. Wo himba ningna nomba, osva kava doa vinina honamba hembra.

Indhanamba Monglava Eishomnavna Yesusm.

¹⁷Indhanamba esvema pulundvund vevna, nonamba Yesusva deuhvhovnamba Lasarusmba mindilva, omnavnamba, pholahangalmba pokamariniva. Wo doa himba vinamba, moamba vruwul vivnna owalmba, osva ona, Yesusva os vei. ¹⁸Wo indhanamba ahui vevna, nonglalmba Yesusmba, noinda himba hillivnamba nom mendekliandram.

¹⁹Wo Varisinindva hevm eishovna, una, memba pimba alhuvpa honi Yesusna mendekliandarava, ambo pimba seposa uv moalm. Manara, indhanamba pethanindva indkumbiva doa hemangas pelpethamnav.

Yesusva Ishunna Hevna Dahalmom.

²⁰Eva diva monglava Griknindva doara lovahvna, himba sembayangm ambanamba Pasovatihram Yerusalemram Yutanindmongom. ²¹Himba

anga Pilipindam, Pilippa nomba Betsaita kembellini Galili provinsrini. Hev umnina, mendekli, kava nonglalm viv Yesusm. ²²Pilip ishomna Endrum. Wo Pilipi Endrui ihishomnana Yesusmba.

²³Wo Yesusva unna, doa nambaiva phoi, arana ombolva ata hevna pusambava levraholothunvav. ²⁴Heva os kamba si boasna dahavav. Memba os, maim oi, indhanarini witkul koko vev osora. Witkulva koko veperava petharamba, braovevav. Wo kulva esvemava kethavra. Wo heva os hembra braovemba owai vellava, wo osva himba si esvemava kethavavmoa nihilva.

²⁵Himba nomba hevماغasva duus vrevrava, himba si owolakohavra. Heva himba nomba hevna undmba popeng vrelmba owai vevrava hona petharava, si himba wohlohvav yunalm. ²⁶Himba nomba kamba andra vinivrava, heoa kam engivra. Wo kana andranindva si waivivra kamba, hivemava eva kava avra. Kana ara si okolawol vevra, himba nomba kamba andra vinivrava.

²⁷Daipotava kamba doa kin yuhle. Ata eva kava es ovav? Os ata kava ovavma, ara, kamo kolvro, kamba dahavavmoa. Owai, kava prov men honanam, os kava manapenam kinmba guavra. ²⁸Ara, yeoa pevna pusambamo ambara levraholotho. Wo moalamang ophona senamini, kava doa venata, wo eva si henga kava vevav.

²⁹Wo indhanamba nomba di pulundvund vevnamba, nomba moalamangmba hillivna. Wo himba os uvna, hul ov. Wo heva os monglava os uvna, ovsongolnindrini hembra ishomnav. ³⁰Yesus unna, no moalamangva temba yem, kamba owai. ³¹Daipotava memba Sesoava doa yem pethanindm lesvoawolalm vev. Wo doa daipotava himba si wulengva piangavav pethanindna kuwulmba Setanmba. ³²Si boasna kamba sena wukleihivav, wo nonamba kav indkumbim si os nembraomana vevav kaidava. ³³Yesusva ishunvna honamba, osm ora, si os kamba dahavav kruserava.

³⁴Wo indhana noi avnam, hev umnina, kava hillina lohohmorava, os Kristusva si yunalm wohavav. Wo manara yimba oi osva, arana ombolva si dahavav? Wo an nomba arana ombolva?

³⁵Wo Yesus ophona, upsilva si yemba wonasambaihavav. Wo beswonam lohmana vevm, nonamoa upsilva lohvrava. Wo ata homeis sia yem kekaiv vevm. Himba nomba sikulmonamba lohmana vevrava, himba tit vev, osva kava henamonam gav? ³⁶Wo noinda osva yeoa keknam undnahonam lovahthamno kam, mendahva kava yemba wonavrava. Wo osva yimba si upsilna towandasalalnonoa avav. Nonamba Yesusva honamba osva ishopianamba, himba os gana, kokmondha vrevna hevmba indhanakomonam.

**Yutanindva Mindnam Keknamba Undnahonamba
Lovahthamnavnamoa Yesusmba.**

³⁷Eva Yesusva doava mendekli andrava vinvna indhanana novrava, heva os owai, himba mendah keknamba lovahthamnavnamoa Yesusmba.

³⁸ Memba honamba nom, temba Aisaiava moashulnindriniva ishonamba, himba wohengivna. Os novol velohv,

Mendekli, anmund kek vithiv honamba moamba, kava memba ishunvpa hembra? Anmund nunglina doava yena andrasowolva, wo he una, honamba phov Sesoanamiangas? *Aisaia 53:1*

³⁹⁻⁴⁰ Wo mongmomba Aisaianamba eva novol velohv os,

Sesoa doa no indhanana novm ehlathowol vinvna, wo hev hena nengavnangm indkokla vrowol vinvna. Sesoava osva owai vewol vetava, wo himba beswonam novvivavta, wo beswonam ningvavta, wo kava hembra sishona vrowol vevav, heva os owai. *Aisaia 6:10*

⁴¹ Aisaiava ishona os, manara noinda himba doara heva nonglana Yesusna pusambakambamba, wo eva hem doara ishomnavna. Hev unna, Yutanindva owai, Yesusmba undnahonamba keknamba lovahthamnavmoa.

⁴² Wo heva os monglava keknam undnahonam lovahthamnavna Yesusmba, eva nomba Yutanindna kuwulva mindnam. Heva os Varisinindnapenamba himba osva uvnamoa, kava keknam undnahonam lovahthamnav hembra. Himba pem vivna, osra ata kamba wolapulvo vevav sembayangdiniva. ⁴³ Himba undva os vivrivna, indhanaoa kamoia okolawol vivra, himba osva ningvnamoa, Sesoa kamoia okolawol vevra.

⁴⁴ Wo Yesus dandwonam ophona, yimba himba nomba kamba undnahonamba lovahthamnavrava, yimba tanam eva undnahonam lovahthamnavrata hem, nomba temba himba kamba homba wolaihapranamba. ⁴⁵ Wo himba nomba kamba nonglavpa, wo eva himba nomba nonglavta, temba himba nomba kamba wolaihapranamba.

⁴⁶ Kava pusambamsna prona hona petharamba. Kava osm prona, himba nomba kamba undnahonamba lovahthamnavrava, si avavmoa sikulmonamba.

⁴⁷ Wo himba nomba kana moamba hillivrava, wo engwol vivramoa, kava hembra nomba lesvhoawol vevramoa. Noinda kava lesvhoawolalmba prunnamoa pethanindmba, heva os lopshalm pethanindm. ⁴⁸ Heva os lohvta, lesvhoawolalmba hem, nomba temba ningvmoa, keknamba kamba lovahthamnalmba, eva vreivmoa kana moamba. Moamba nonamba kava numhowol vevpa, temba hem lesvhoawolalm, ovi pethai hoai evewolvram.

⁴⁹ Kava nonamba memba numhowol vevpa, kanamba kavnaminiva owai. Ara noi ten kam wolaihapranam, ishomnana kamba, osm ishuniilm, eva osm numhowolalm, ara ten ishovm. ⁵⁰ Wo kava wiyera av, osva undva almba yunalmba nomini prov, ara ten ishovm. Wo noinda osva nomba temba kava ishovpa, ara kamba wuhhov, isholmba nomba.

Yesusva Hevtindina Monglam Poswol Vinna.

13 ¹ Doa Yutanindna Pasovatihva mumra vinvna. Yesusva nengna, doa kanamba nambaiva mura vev, pholmba hona pethariniva,

wo hengam galm araindam. Himba elsus und vewol vevna hem, nomba hevnanonoamba hona pethariniva, wo himba osangas wohund vewol vavovna, verava, dahara. ²Doa venamba, okombava pelangalla avnamba, Yesusva wonnevna innemba hevtindimba. Setanmba doa doara wuhhona Yutas Iskariotmba, Yesusmba ungrundmba novpa wolaihanilmba. Yutasva nomba Simonna ombol. ³Yesusva nengna, os manimani doa aramba kana englara hohlona. Hev vena, os nengna, kava prona Sesoanamini, wo henga kava si gavav Sesoaindam. ⁴Wo wonnevnamba, Yesusva phonamba, lohvhova, wo selvlanhamba hevna kayen ambariniva, doa handuk moan vranamba, hevna mutengra mokaltha. ⁵Wo hev vranamba, baketra po sovho, wo doa osoa poswol vinvna hevtindina monglam nona. Wo no handukna sowol vinvna, hivhoawolalm, ten hev mutengra mokalthanam. ⁶Doa venamba, ona phona Simon Pitainda. Wo Pita omnana Yesusm, mendekli, es hevpa yimba ata kana monglava poswol vevavma?

⁷Yesus ophona, yimba levrapivmoa honamba, kava memba vevpa daipotava. Heva os yimba si sewonam lihavav. ⁸Pita omnana, owai, yimba ata kanamba poswol vevavmoa monglava. Wo henga Yesus ophona, kava yenamba monglava poswol vembra owai vetava, kalmba yimba owai. ⁹Simon Pita henga ophona, yimba kanamba monglava poswol vipiarava, wo kana veo, englam poswol veo, kum posvo.

¹⁰Yesus henga omnana, indhanariniva porava dalohpiarava, wo henamba nihva besal lohv. Wo himba hengava monglamangas poswol velmangas vev. Wo yimba indhanariniva nihvuhinhui, heva os yimba indkumbiva owai. ¹¹Yesusva doara nengna, osva ona, henoi ata kamba novpa wuleihinvav ungrundmba. Temba noinda Yesusva osva ona, yimba indkumbiva nihvuhinhui, heva os yimba indkumbiva owai.

¹²Nonamba himba monglamba poswol vepieinnamba, doa himba henga hevna kayen vethanamba, ovhoa. Yesus osihinna, yimba doa levrapivolima, memba daipotava kava viniva yemba? ¹³Yimba kamba alv, os guru, eva os, mendekli. Wo memba lehra, manara noinda kava memba osmta lohv. ¹⁴Ka yena mendekli eva guru, poswol vini yena monglamba. Wo yeoa eva os poswol vinvm pevna mongawa Kristusnindna monglamoa. ¹⁵Kava memba lihini yemba, osm yeoa os viluwulkovo.

¹⁶Kava ishuny yemba tanam. Andranindriniva mendekliva owai hevna duangnamba. Indhanariniva gavpa, himba senamba avmoa henoiindava, temba himba hembra wolaihangnamba. ¹⁷Yimba liheitava honamba, memba kava veiva, yimba si indk vithivav, yimba osangasta vinvrava pevna mongawa Kristusnindmba.

¹⁸Kava ishuny moa yemba indkumbimba. Kava lihawol vev nomba, temba kava kikih vewol venamba kavalmba. Heva os temba doaraminiva tombaimorava lohvpa, os kava wohengvra.

Indhanariniva memba neiva kana meyarava, himba doa kamba
indkokla vrei.

Buk Song 41:9

¹⁹Kava ishunv yemba honamba doara, si os vevav sewonamba. Wo nonamba vevrava, yimba si levrapieivav, osva kava he. ²⁰Kava ishunv yemba tanam, himba nomba omnatava hem nomba, temba kava wolaihangavrava, os umnivra kamba. Wo himba nomba omnavrava kamba, wo eva omnavrata hem nomba, temba himba kamba wolaihapranamba.

Yesusva Ishunvna Hevna Dahalmom.

Matiu 26:20-25, Mak 14:17-21, Luk 22:21-23

²¹Yesusva honamba ishopianamba, doa kinmba hembra sna venavna i. Hev moakus unna, kava ishunv yemba tanam. Mongo honi yerini ata kamba ungundmba novpa wuleihinav. ²²Wo hevtindiva di hevnm novna anongla vevna. Himba tit vivna, osva anm ishomnav Yesusva hevpa? ²³Mongova hevtindirivna doara di mura avna Yesusinda. Wo hem nomba Yesusva mindnam hembra und vevna. ²⁴Simon Pita ahalnovna venana, sahmanalm Yesusm, anm hevpa yimba nomba temba ishomnav?

²⁵Wo himba temba murava avnamba Yesusindava, nonglanamba, sahmana, an hevpa si yemba ungundmba novpa wuleihinav? ²⁶Wo Yesus ophona, ata kava hona rotiva neluspora velthavav. Wo ata kava hem nom vraohvav, henoi ata kam ungundm holvorahunvavm. Wo Yesus roti vre, wo hev neluspora velthanamba, vraohe Yutas Iskariotm, Simonna ombolm.

²⁷Wo doa Yutasva vrvanamba rotiva, Setanmba hembra wuhho ovravna lilnam. Yesus omnana Yutasmba, nomba yimba temba ata vevavpa, lelnam veo. ²⁸Mongova owaimomolmba levrapivongovnamoa, nomba temba meyarava aevulvnamba, osva manaram Yesusva omnav Yutasmba osva. ²⁹Heta disumbva sunguwulamana vevna, wo monglava hevtindiva os ningvna, Yesusva ishomnav Yutasmba, mana vemam sovawolalm hona Pasovatihram. Hev vevna, os ningvna, Yesusva Yutasmba nengmanav, os daswolalm manimani monglamoa innehuinindm. ³⁰Wo Yutasva wohvrangas vev nomba rotiva, Yesusva temba vraohnamba, wohpholahangav lelnam amballam. Doa sinim memba vivna.

³¹Nonamba Yutasva pholahanganamba, Yesusva unna, pusambava kanamba ata daipota indhanamba nunglivav. Wo osva Sesoana pusambava nunglivavta. ³²Kava ata Sesoa arana pusamba ambara levrahoolothovav, wo ara ata kana pusambava ambara levrahoolothovavta, wo lilnam ata vevav. ³³Yesus unna, kana otol, kava ambo ata yemba wonasambaihavav. Yimba si kamba aslaluwuvav, wo temba kava ishunnamba Yutanindmba, men kava yemba ishunv. Domba kava gavavpa, yimba domba ambvavmoa. ³⁴Kava vrahunv yemba nemel

moamba. Undnahonam und avramana vevm monglamo. Yeoa und vewol vivm monglamo, os men kav yem und vewol vevnam. ³⁵Indhanamba indkumbiva si nungeilvra, osva yimba katindi, yimba und vewol vivrava monglamba.

Pitava Ata Os Owovav, Kava Tit Venav Yesusmba.

Matiu 26:31-35, Mak 14:27-31, Luk 22:31-34

³⁶Simon Pita osahmanana Yesusm, hem yimba galmba vev? Yesus omnana, memba domba kava ongovpa, yimba kamba domba patvmonavavmoa daipotava. Yenamba sewonam. ³⁷Pita henga sahmana, manara ata kava yemba engpramba owai vevav? Kava eva dahalm ovta yeindava. ³⁸Yesus ophona, si ambo tanam yemba dahavavma kaindava? Tanam, ayamba ata os ophovav, yimba ata samblamongolm osva owovav, kava tit venav Yesusmba.

Yesusva Ishunvna Hevtindim, Monamba

Dihelgalmba Araindamba, Men Kangas.

14 ¹Yesus unna, manam yenamba undva potrava pihangu vinvav. Owai, Sesoamangas undnahonam lovahthamnavm. Eva undnahonam lovahthamnavm kam. ²Diva kana arana deuvrava mindnam vuhemba luhungu vev. Owaingava, kava ata ishunvavmoa honamba yemba osmba. Kava domba vuhem pongvhueinilm yem geinv. ³Kava vuhemba pongvhueindava, wo henga kava si provav. Wo kava yemba wongavav kavalm, osm yimba di aevulvra, ten kav avm. ⁴Yimba nonora lovahv monamba, no kembellamba memba kava gavpa.

⁵Tomas omnana Yesusm, kava tit viv, yimba domba temba gavpa. Wo es hevpa eva kava liheivav monamba? ⁶Yesus omnana, monamba araindamba men kangasta. Moanonoana plalva menta kava kav. Wo kaindangas indhanamba tanamba undnamba av. ⁷Yimba beswonamba kamba levrapiatava, eva yimba osva levrapiavavta kana aramba. Wo heva os daipotava yimba doa hembra liheiv, wo eva yimba doa nunglina hembra.

⁸Pilip omnana, indthueinu kam arapevm. Honamangas kava mindnamba ningv. ⁹Yesus ophona, Pilip, kava eva omhonanam wonamana venama, wo heva os yimba kamba mendah tit vrvina? Yimba himba nomba temba kamba nonglanamba, eva aramba nonglanata. Wo manara yimba ovna osva, indthueinu kam arapevm? ¹⁰Yimba wiyera avma, osva kava aramera av, aramba kamera av? Wo moamba nomba kava yemba temba ishunvpa, kanaminiva phovmoa. Ara kaindava av, wo himba hevna andra vev kananamba. ¹¹Yeo keknam kek vithivm, memba kava osva oiva, kava arainda av, eva aramba kainda av. Owaingava, nom nunglivm, mendekliandram, nom ten kava vaomana vevnam, wo osva yimba honamba kana moamba kek vithivav.

¹²Kava ishunv yemba tanam, yimba himba nomba keknamba kamba lohmanavrava, si vevra manimani, os ten kav vevnam. Himba si vevra snamba eva mendeklikumbiva mana vemava osva, noinda kava gav araindam. ¹³Wo yimba sahmanavrava mana vemava kana nihilnamba, kava si wohvengas venavra yemba. Wo osva kava Sesoa arana pusambava ambaram levraholothunvav. ¹⁴Yimba sahmanavrava mana vemava kana nihilnamba, kava vengas vevra.

Yesusva Os Ona, Kava Si Sesoasongolmba Yemba Wolaihaprinvav.

¹⁵Yimba kamba undva vitava, yimba si vivra manimani, nomba temba ishovnamba kava. ¹⁶Kava si aramba sahmanavra, wo himba si yemba mongom indhanarinimba wolaihaprinvav. Himba honana si yemba kolvrowol vevav, wonalm yunalm yem. ¹⁷Nomba kokoldombnindriniva Sesoasongol, moanonoam nom wulluhvm Sesoana. Pethanindva si hembra patvmonavavmoa, noinda nunglivmoa hembra, eva liheivmoa hembra. Wo heva os yimba liheiv hembra. Himba wonav yemba, wo himba si einvra yeinda.

¹⁸Kava si yemba bumb vewol velahangavavmoa, osva ora, otol hevho aevulv tengul, owai. Kava henga si prunvav yeindamba. ¹⁹Wo mani wenokombawonamma pethanindva hengava si kamba nunglivavmoa, heva os yimba si nunglivav kamba. Noinda ka wohavra, eva ye wohaevulvra yunalm. ²⁰Wo no nambainamba yimba si os wiyera avav, kava doa arainda av. Yimba si nomba wiyera avav, manara, yimba kainda aevulv, eva kava yeinda einv. ²¹Yimba himba nomba kana moamba levrapivolvrava, wo engivrava, kava si os lihawol vevav, yimba noi, temba kam und vivm. Wo kana ara si und vewol vevra hembra nomba. Kava si hembra und vevrava, wo kavm holvonethamnavav hembra.

²²Wo Yutas mongo, Iskariotva owai, omnana, heva os mendekli, esra hevpa yimba onengv, osva yimba holvonithinvav pevmba kamba, heva pethanindm indkumbim owaiva? ²³Yesus ophona, himba nomba kamba und vetava, wo osva himba kana moamba engvra. Wo ara kana hembra und vevra, wo kava araiva heindam epravra, wo deuv wulphovra kava heindava. ²⁴Himba nomba kamba undmba owai vevrava, eva owaita, kana moamba engvmoa. Honamba moamba yimba memba hillivpa, kanamba kavnamba owai. Memba kana aranamini, ten kam wolaihapanam.

²⁵Kava doa ishomana vinna manam manam yunalm honamba yemba, nonam yem kav wonamana vevnam. ²⁶Heva os kokoldombnindriniva si yemba numhowol vevra, osva manam manam. Himba si otuhtwol vevra yemba, nengalm nom manimani, ten kav yem ishunvnam. Honamba kokoldombnindriniva Sesoasongol, hembra Sesoa si wolaihapravav kana nihilnana. ²⁷Kava yemba sandhalahangav. Kavna yemba undwonamba

wonvev. Pethanindva yemba ondeiswity, undwonamba wonvelmba. Wo noinda osva manam yimba pevna undmba potrava dembhapuv vevav owai. Manam yimba pemba vivav. ²⁸Yimba kamba hilli, yemba kava ishuni, kava gav, heva os kava prunvav henga yeindamba si. Yimba kamba und vetava, yeoa indk vithu, osoa kava henga gav araindam, noinda himba mendeklinonoa, kamba kuvhoav.

²⁹Doa kava honamba yemba men ishuni, si os dawonamba vevav. Wo nonamba osva vevrava, yimba si nunglivav, osva Yesusva tanam ona honamba. ³⁰Kava ata yemba mindnamba wonishovavmoa, noinda Setan kuwul hona pethariniva doa proi. Heva os himba hevnasowonamba mana vemava kamba venavavmoa. ³¹Pethanindva honamba si nunglivrava kanamba dahalmba, si os levrapiolvav, osoa kava aram undva vev. Wo kava nongas wohvev, ten ara kam omnanam, nom velm. Dowau, doa angalohra pioa honaminioa.

Yesusva Wainwosalmsna Livna.

15 ¹Yesusva nomba moamba mendah nui vrinvna osva, kava kavpa tiwosalnonoa. Wo aramba kanamba tiwosal osona aral. Nomba weselva os ningthiv, wainwosal. ²Vavawonamba klavoklalva kanamba wohlundthoavavmoa movolnamba, wo nomba snamba ara helvahanga vev. Vavawonamba klavoklalva temba wohlehra vethavpa movolnamba, wo aramba helvahanga vev soulalangas, os besalangas lohvra, osm elsusva himba mindnam prowovra. ³Yimba doa woranihilangas av. Honamba moamba kava memba yemba ishuluhuvnamba, memba osm yimba doa woranihilangas phovhoai. ⁴Yeoa kainya pepavo, eva kava yeinda petheinv. Tiwosalna klalva lulamba owai vetava hullava, osva nomba klalva movolva kethavramoa. Heoa heva lulavra hulla. Eva yimba osta, yenamba movolva kethavramoa kahuiva. Yeoa kailandangas pepavevm.

⁵Kava wesel hul, wo yimba kana klavoklal. Indhanariniva kaindava wohpethatava nihrava, eva kava heinda wohpethavavta nihra, wo himba movolva osva mindnam kethavovra. Wo heva os kahuiva yimba mana vemava vevavmoa. ⁶Himba nomba kaindamba nihrava pethamba owai vevrava, wo himba nomba temba snal, tikla, noi ten helvahanga vivm. Wo klavoklalva soulongavra, wo indhana soulalva dumbvra, suweram pingipuv vevra, suwem talm. ⁷Pepavo kainya nihra, wo engivm kana moam. Yimba vetava honamba, wo mana vemava yimba ningvrava, sahmanalmba, wo ambo yimba novoa vinvra. ⁸Yenaoa movoloa esvema opihiluhunda, wo osva nungeilvra yemba, yimba katindi av. Yimba honamba osva vivrava, indhanamba aranamba pusambakambamba nunglutithoavra.

⁹Kava und vewol vev yemba, os ara ten kam und vevm. Wo doa wohpepavo kainya nihra, wo osva si kava yemba und vewol wohvevra.

¹⁰Kava wohhellengas vena kavna arana moamba, wo noinda himba kamba wohund vev. Wo yimba eva vetava osva, kana moamba engitava, yemba kava si und vewol wohvevra. ¹¹Kava ishunv yemba honamba, osm yimba indk vithivra, os men avm kav nona. Kava ninginv yena indk vethalm, osm yemoa pilivhoawol vera.

¹²Men kanamba moamba, und vewol vivm monglamoa, os men kav yem und vewol vevm. ¹³Mendekliva und vewolal, indhanariniva mongova daheintava hevna sehelmba. ¹⁴Yimba kana sehelnonoa, yimba vetava, osva nomba memba kava ishunvpa yemba. ¹⁵Kava yemba sevelovmoa osva, andranind. Manara, andranindriniva tit vev, nomba hevna duangva temba nengvpa. Wo heva os kava daiptava yemba os sevelov, seh, noinda kava doa yemba iana, nonamba temba kava hellevnamba araindava.

¹⁶Yimba kamba kikih vrinamoa, ka yemba kikih vewol vena. Wo ka daswolna honamba andrava yemba, bukithengu velmba, movolmba kethapralmba. Kava ninginv yemba, kethapralm movolm, osm noi si yunalmba lohvv. Wo aramba si manimani yemba daswolvra, yimba osihminivrava hembra kana nihilnamba. ¹⁷Men honamba kanamba moamba, yeoa undalm vewol vivm monglamoa.

Yesusva Hevtindimba Lohohsama Okilithinna.

¹⁸Pethanindva indkumbiva yemba sahonamba vinvrava, ningvm os, himba miva kamsna vinivna. ¹⁹Yimba hona pethanindriniva atava, wo yemba und vivra, os ten hev vivm. Wo heva os kava doa yemba kikih vewol vena, pulvolmba hona pethariniva. Wo noinda osva yimba hona pethariniva owai. Wo memba noinda pethanindva yemba vinv sahonamba. ²⁰Keknam ningvm honam, men kav yem ishunvm. Ombandhana andranindriniva himba mendekliva owai hevna duangnamba. Indhanamba kamba sahonamba vinitava, eva himba si vinvrata yemba. Wo himba engivrava kana moamba, eva himba si enginvrata yenamba.

²¹Himba si vinvra manimani honamba yemba noinda kainda. Manara, himba liheivmoa, nomba himba temba kamba wolaihpranamba.

²²Kava promba owai vetava, ongawolalmba hembra, ata Sesoava hembra ishuntamoa, osva yimba indkokla vina. Wo heva os daiptava himba novtotholmba osva uvavmoa, osva kava indkokla vinamoa, manara, noinda kava doa hembra ongawolna. ²³Himba nomba kamba vreipra vritava, eva himba aram temba vreipra vritva.

²⁴Manara, kava andrava vinvna hovrahovra heindava, osva an eva doava vena. Kava doarava owai vetava, velmba nomba andrava, Sesoava ata hembra ishuntamoa, osva yimba indkokla vina. Wo heva os daiptava himba doa nunglina, nomba temba kava doava venamba, wo heva os

himba mendah vreipra verumbtv kamba araimba. ²⁵Heva os memba honamba osm vena, os novol velohv lohohmorava, os,

Himba ambo kamba nis vreipra vrina, moamba lohvnamoa.

Buk Song 35:19 eva 69:4

²⁶Kava si wolaihaprinvav yemba kokoldombnindrinim kavna aranaminiva. Himba Sesoasongol, himba wulav moanonoa. Nonamba himba provavpa, himba si ishunvra kamom yemba. ²⁷Wo eva yeoa eishunvm indhanamoa kamomoa, manara noinda yimba doa kamongo euvmona vena, di hevm kav andrava seilm kovonevnam, eva veiva, daipota men.

16 ¹Kava ishunv yemba honamba, osm keknam avm honindaoa. ²Indhanamba si wolapulvo vevra yemba hevna sembayangduvriniva. Si nambaiva provav, nonamba himba nomba yemba helvakomolmba vivrava, wo himba si os ningvra, kava memba sembayang venalm venav Sesoam osva. ³Himba si os viwul vevra honamba, noinda himba owai, lihevmoa Sesoamba aramba, eva hev vei, lihevmoa kamba. ⁴Kava men yemba ishunv honamba. Wo nonamba honamba nambaiva provrava, yimba si ningvra, osva himba doara doa pimba unna.

Sesoasongolna Andra, Kristusnindm Suwemsna Tavra Kilihawolalm.

Yesusva mendah ishunvna, kava ishunnamoa honamba yemba, manara, kava nihra wonvevna yemba. ⁵Heva os daipotava kava henga gav dom, hanoi ten kam wolaihapanam. Wo heva os mongova yimba osahmanimoa kamba, osva hem yimba gav? ⁶Undva yenamba doara potra pihaprini, noinda kav honam ishunim yem. ⁷Heva os kava ishunv yemba tanam. Memba hevm besal, osva kava yemba sandhalahangav. Wo nonamba kava wohgavrava, kava si wolaihaprinvav kokoldombnindriniva yemba. Kava gamba owai vetava, wo eva osva si kokoldombnindriniva provavmoata.

⁸Nonamba kokoldombnindriniva provrava, himba si os pethanindnamba ambaramba wulphunvav, vei, hevna wevsakoklam, eva monam, osm Sesoana novrava himba lehra wohavra, eva osoa Sesoana lesvhoawolallava. ⁹Himba indkokla vina, manara, himba kamba owai, keknamba amnavnamoa undnahonamba. ¹⁰Wo himba si lehrava avra Sesoana novrava, manara, kava gav araindam. Yimba si nunglivavmoa hengava kamba. ¹¹Wo kokoldombnindriniva si novpa wuleihinav hembra, osva Sesoana lesvhoawolalmba tanam lohv, manara, hona pethanindna kuwulva Setanmba, doa himba owolakohana wetatmorava.

¹²Kava mendah men moamba ieinv, yemba ishunilmba, heva os owai, mani eva eskandma. ¹³Wo heva os nonamba Sesoasongol provrava, himba si

yemba deisumbi lohmana vevra moanonoaram, manara, himba hevpa wulav moanonoa. Himba si ishovramoa hevna moamba, himba si ishovra moamba, nongas ten hev hellevram, wo si ishunvra yem nom, mani si provav.

¹⁴Sesoasongolva si kana pusambakambamba ambara levraholothunvav. Noinda osra, himba wulprovav kana moamba, wo ishunvav yemba. ¹⁵Wo nomba manimani aramba temba iavpa, kana. Wo noinda kava ov memba osva, Sesoasongolva si wulprovav kana moamba, wo ishunvav yemba.

**Yesus Unna, Seilva Yenamba Si Undva Potra Piheinvav,
Heva Os Sism Yimba Si Losnamonamba Owovav.**

¹⁶Hev unna, doa mumra vev, osmba yimba si kamba nunglivavmoa hengava. Wo henanam henga yimba si nunglivav kamba. ¹⁷Monglava hevtindiva hevm asahmana ungu vevna, esm hevpa memba Yesusva osva oi, mani wenokombawonamma, yimba si nunglivavmoa kamba, wo heva os eva mani wenokombawonamma, yimba si nunglivav henga kamba? Wo esm memba hevpa ongei himba, manara noinda kava gav araindam? ¹⁸Wo henga hevm asahmana ovnam, esm hevpa osva oi, doa mumra vev? Kava levrapivolvmoa, himba nomba temba ishovpa.

¹⁹Yesusva nongalna hevtindimba, ningv, sah ovralm honamba kamba. Wo doa hev unna hevtindim, yimba pevm asahmana ovma, nom men ka oim, os mani wenokombawonamma yimba si nunglivavmoa kamba? Wo henanam mani wenokombawonamma yimba si nunglivav henga kamba? ²⁰Kava ishunv yemba tanam, yimba si wenumbsna avav, heva os indkumbiva pethanindva si indk vithivav. Yemba si ksuvhoappravav weselmsna, wo heva os honamba yenamba si nilhaprinvav, indk vethalm.

²¹Nonamba ungevliriniva otolmba lengvrava, hembra nihsesoava sna venavra i, noinda doa nambaiva phoi, otolmba lengalmba. Wo heva os nonamba henamba otolva lengpevrava, himba henga nihsesoava maivethavra. Himba maivethai, noinda himba wohindk vethai, noinda otolliniva doa kava lengei. ²²Eva yemba osta, daipotava yimba wenumbsna av. Wo heva os kava si nongalvav yemba henga, wo yimba si indk vithivav. Wo indhanariniva mongova si hiluvla vewol vinvavmoa yenaminiva indk vethalmba.

²³Nonamba yimba si kamba henga nunglivav, yimba si osihminivavmoa kamba mana vemamba. Yimba si aram seihminivra. Yemba kava ishunv tanam, ara kana yemba si daswolvra mana vemava yemba, yimba osihminivrava kana nihillava hembra. ²⁴Nemet doara, veiva, daipota men, yimba osihmininamoa mana vemamba kana nihillava doava, owai. Osihminivm, yimba si dumbvra. Wo yenamba indk vethalmba si pilivholuhunvra emerava pomsna.

Yesusva Doa Nombs Pipahana Kikpulva Hona Pethariniva.

²⁵Kava doa ishunna yemba honamba manam manam, inelmonamba. Wo heva os nambaiva si provavpa, nonamba kava si sna moamba

ishunvramoa yemba mana vemamba. Kava si ishunvra yemba ambo bambanam arana moamba. ²⁶Wo no nambainamba yimba si osihminivra aram mana vemamba kana nihilla. Kava ishov, os kava si owai vevra, aramba sahmanalmba mana vemamba yemba. ²⁷Owai, aramba hev himba yemba und vewol vev. Himba und vewol vev yemba, manara, yimba und vivpa kam. Wo himba und vewol vev yemba, manara, yimba undnahonam ningvm, os kava henamini prona. ²⁸Kava prona aranamini hona petharamba. Daipotava kava doa phov pethariniva, henga gav araindam.

²⁹Wo hevtindi umnina Yesusm, yimba men daipota bambanamba Lehrava kamba ishunv. Yimba inelmonamba ishoimoo, osva kava ata es eva levrapivolta. ³⁰Kava men nungliv daipota, osva yimba nonorangas lohv. Yimba indhanarinina sah ovralmomba opla vramnavav, osva himba mendah yemba osahmanavavmoa. Honamba kamba numliheinv, osra yimba prona Sesoanamini.

³¹Yesus ophona, osoa yimba daipota men undnahonamba av? ³²Hillu kam, doa nambaiva murapeta wohvev, nonamba yimba si indakonda pilialowolavav. Yimba indakonda si bukithavra, himba nomba heva hevna deuvkembellam gavra. Nomba nambaiva doa men. Yimba ata dasva buovav kamba. Heva os kava kavhova ata gavavmoa, manara, ara hev kamba waiav. ³³Kava ishunv yemba honamba, osm yimba beswonam undwonam avra. Wo hona petharava yimba si kinmba dumbvra, heva os homeis keknam avm. Kav doa hona pethana kikipultovpa nombs pipahana.

Yesusva Sembayang Vinvna, Kolvrowol Velm Hevtindim.

17 ¹Yesusva nomba manam manam ishophieinnamba, doa nov vevongo ve senam. Hev sembayang oovovna, ara, nambaiva doa phoi, yea kana pusambamoa ambara levraholotho, osm kava eva yenamba pusambava ambarava holothunvav. ²Yimba doa kamba vraohna keknasowol, mera velm indhanam indkumbim. Osm kava daswolvra und, nonapopolmba yunalmba almba no indhanamba, yimba temba kamba wolamnanamba. ³Plalva, undva nonapopolmba yunalmba almba, memba osm, indhanariniva yemba lihavra, Sesoanonoava mongal, wo eva no indhanarinim lihavra, Yesus Kristusm, nom ten pev wolaihapranam. ⁴Kava andrava doa vepiana, nomba yimba temba kamba omnanamba velmba. Wo osra kava doa yena pusambava ambara levraholothunna hona petharamba. ⁵Wo daipotaoa, kanamoa pusambamoa ambara levraholotho pevindam. Nom ten kav ten wulanam yeinda, nemet pethava os yimba venamoa.

⁶Yimba wolamnana indhanamba monglava kamba hona petharini. Kava doa novpa wuleihinna hembra, osva yimba snal av. Wo nomba

indhanamba temba yena, wo yimba wolamnana hembra kam. Himba wohengivna yena moamba. ⁷Daipotava himba nonora av, osva manimani memba yimba kamba dombraohnamba, prov pevnaminangas. ⁸Kava vrahunna hona indhanamba moamba, nomba yimba temba kam vrahonamba, wo himba wohvreina nomba moamba. Himba nomba nonora av, osva kava tanam yenamini prona.

⁹Kava sembayang vinv hembra men. Kava sembayang vinvmoa indhanamba indkumbimba pethanindmba. Heva os kava sembayang vinv no indhanam, pev ten kam wolamnanam, manara noinda himba yena. ¹⁰Memba kava wonavpa, yena pevhonangas, wo yimba nomba wonavpa kanangas. Wo indhanamba indkumbiva nungeilvrava katindimba, himba si os nungeilvav kana pusambamba. ¹¹Daipotava doa kava ten prov yeindam. Kava si avavmoa petharava daipotava. Wo heva os hona indhanamba mendah aevulv hona pethara. Ara, yimba sena woheinv, yeoa wonavm beswonam pevna keknaasowol nihilla, noi nihil men pev kam awothonam, wo kava nona memba keknaamba wohlohv. Yeoa vinv hemoa os, osm himba si mongawatindilm avra, os vei, ye ten eva men ka.

¹²Kava nonamba wonavnamba hembra, kava wonavna beswonam yena pevna nihilla, noi nihil ten pev kam awothonam. Kava dandana vewol vevna hembra, wo mongova heriniva si owolakohavavmoa. Mongongal owolakohana, doara aembul wohvena hembra. Himba owolakohana, osmba nomba temba moamba lohvpa doaramini tombaimorava, si os vevav.

¹³Ara, kava doa ten prov yeindam daipotava. Heva os kava sembayang vinv honam kavtindim boasna, mendah men kav avm hona pethara. Kava ishov honamba manam manam, osm hona indhanamba wohlundthoavav kana indk vethalna. ¹⁴Kava doa wohiana hembra yena moanamba. Wo indkumbiva pethanindva hona indhanamba sahonam vinv, manara, himba hona pethanindmba owai, os men ka. ¹⁵Heva os kav yemba osva osahmanavmoa, yeoa hemoa wolapho veo hona petharinioa. Heva os kava yemba os omnav, yeoa hemoa kokmondha vewol vevm Setannapenamoa.

¹⁶Himba pethanindnamba owai, os men kav, kava eva pethanindnamba owaita. ¹⁷Moamba yenamba tanamolnonoam, wo moam pevnam yivilthinvm hena undraoa, wo himba yem pevelmangasm amnavra honana. Manara, yenamba moamba tanamolnam. ¹⁸Kava doa hembra wolanga vungu vena indakonda petharamba, os men ye kam wolaihapanam hona petharam. ¹⁹Kava doa ophona kavmba, yemangasva nonamba amnalmba. Kava vinv honamba hem, osm himba tanam plasra aevulvra, yemangasm amnalm.

²⁰Kava sembayang vinv hona indhanam, wo heva os ka vei, sembayang vinv indkumbim, henoi si undnahonam lovahthamnavavm kam, noinda

hona indhanana moara. ²¹Ara, kava sembayang vev, os no indhanamba temba kamba undnahonamba lovahthamnavpa, heoa mongawatindilm nilhaprara. Yimba kainda av, eva kava yeinda av. Kava sembayang vev, os hona indhanamba eva heoa saivundata mongawatindilm piindaoa, osm indkumbiva pethanindva si nungeilvra, osva ye kamba wolaihaprana.

²²Kava doa kavna pusambamba ambara levraholothunna hona indhanamba, nomba yimba temba kamba wulamnanamba. Kava osva vinna, osm heoa noinda mongawatindi ara, os men vei, ye eva ka.

²³Kava si einvra heinda, wo yimba si avra kainda. Wo himba si wohavra mongawatindinonowolm. Wo pethanindva indkumbiva si os nunglivav, osva yimba und vewol vev hona indhanamba, os men pev kam und vevm.

²⁴Ara, kava ninginv hona indhanam, men pev kam wolamnanam, waieuvmona velm kamba, hem eva ata kava kavhova gavta. Kava os ninginv hembra, heoa kana pusambamo a nunglira. Honamba memba pusambava, ye kam vraohna, noinda yimba doara doa kamba und vena, pethamba yimba os venamoa. ²⁵Ara, yimba noi besalnonoa. Pethanindva yemba liheivmoa. Heva os kava kavpa lihav yemba, wo hona indhanamba liheiv, osva ye kamba wolaihaprana. ²⁶Kava novpa wuleihinna hembra, osva yimba snal. Wo henga kava si nov pewoleihinvav hembra, osm yimba snanovna av. Wo himba si avra wevsa besalna, wavra vovhoamnalmba hevmba, snana ye ten kavm wavra vovhoamnavnam. Wo kava si einvra hemera.

Yesusmba Doa Kevrina.

Matiu 26:47-56, Mak 14:43-50, Luk 22:47-53

18 ¹Nonamba Yesusva sembayang vepianamba, wo doa himba hevtindimba nominiva os wongana. Himba anganamba, Kitron pom lovol venamba, os angana. Wo no Kitron ponamilla Oliv Denwit osomba di lohvna. Wo Yesusva hevtindimba dom wongana. ²Yutasva nonora lohvna doara, osva ona, hona denwitva ten nolhra lohv, manara, Yesusva doara di wonalohvnam no denwitmusrava. Yutasva henoi, ten Yesum henga imharavhoamnanam, indkokla vrelm Yesum. ³Wo doa Yutasva siheinvna, deisumbi prolmba ungundba domba osoramba. Himba nom wonprona, vena, valgonindm, polisim. Polisiva nomba himba sembayang andranindna kuwulna, eva Varisinindna. Wo himba noi wulprovna lampu, wokla, bunevalgo.

⁴Yesusva doara nengna, osva manimani ata kamba os venavav. Doa hev phonamba, unna, anm hevpa yimba aslav? ⁵Wo no indhana opulvona, Yesum Nasaretrinim kava aslav. Wo doa Yesus unnam, kava menta. Yutasva nomba temba Yesusmba ungundba novpa wulehinnamba, himba di wonlohvna ungundba. ⁶Nonamba Yesusva osva ovnamba, kava menta, nomba indhanamba henga mumus ovna,

lelga vevnam, os vendral vevna hembra petharamba. ⁷Yesus henga opla vrinnam, anm hevpa yimba memba etepewolv? Wo hev opulvona, Yesusm Nasaretrinim.

⁸Yesus unna, yemba kava os uni, menta kava. Wo yimba kamba memba aslalvpa, nooa indhanaoa heoa henga angara. ⁹Honamba vena memba, osm Yesusna moamba doara lohna, osva ona, sewonamba si os phovav. Kava mongomba novkasowava nombolvhoanamoia indhanarinimba, nomba yimba temba kamba wolamnanamba.

¹⁰Simon Pitava doara wulluhvna ovlakasva. Hev dandwonam selvoranamba, nona sembayang andranindna kuwulna andranindrinina angol singeitpingamna. No andranindrinina nihilva Malkus. ¹¹Yesus omnana Pitamba, henga vilitho ovlakasoia hevna kella pevnaoa. Es hevpa yimba os nengvma, kava hona kinoa velahara, memba aramba kamba piapramniva, owai.

Yesusmba Waiangavna Anasindam.

¹²Doa vena, valgonind eva hevna kuwul, eva Yutanindna polisi kevrina Yesusmba. Wo doa saongna ningivna hembra. ¹³Doa os Anasindamsna waiangana. Anasva Kaiapasna meral lohvna, wo Kaiapasva sembayang andranindna kuwul luhunvna no tahonnamba. ¹⁴Kaiapasva henoi, ten doara ishunnam Yutanindm, os besal hevm, osva mongawa indhanarinim daheinvav indkumbimba.

Pita Unna, Kava Tit Venav Yesusmba.

Matiu 26:69-70, Mak 14:66-68, Luk 22:55-57

¹⁵Vena, Simon Pita, eva mongo owallini Yesustindi, epawohamnava sis Yesusmba. Owalliniva nomba himba lihavna sembayang andranindna kuwulmba honamba. Wo noinda himba pethanginvna sismba no kuwulna pueilmeramba. ¹⁶Wo heva os Pitava di lohvna murapeta tuvpethal. Nomba Yesustindirivna, himba lihavnam sembayang andranindna kuwulmba, himba henga phovna amballam. Hev omnana ungevlirinim di tuvra, wo waisihana Pitam meram.

¹⁷No ungevlirini di tuvra lohvnam, himba omnana Pitam, ye mongova menta no indhanarinina sehelva? Pita ophona, owai, kava tit vev. ¹⁸Nelpongms eiswol vevna, doa vena, andranind eva polisi suwemba singvina. Wo himba di kusovna suwera nelpongms. Wo di Pitamba pathawulvahvna doara himba, suwem dawol velm.

Sembayang Andranindna Kuwul Sah Ovravna Yesusmba.

Matiu 26:59-66, Mak 14:55-64, Luk 22:66-71

¹⁹Sembayang andranindna kuwulva sah ovravna Yesusmba, nom vena hevtindim, eva hev ten numhowol vevnam. ²⁰Wo Yesus opla vremnana,

kava ishunvna musera indkumbimba. Kava numhowol velohvna sembayangduvmera, eva di tempelmera, di ten Yutanind kusolohvna mongawatilm. Kava owaimomolmba ishonamoa mana vemamomba poaitava. ²¹Wo manara yimba kamba sah ovra? Sah owol veo indhanam, nom ten kana moam hillivnamba. Himba nonora av, nomba temba ishovnamba.

²²Honamba osva ona Yesusva ishona, mongova polisiriniva di doara lohvna, he phona, di sang oplov Yesusm. Hev omnana, wo tanam ambo osma, ten pev ishomnavm sna moana pina sembayang andranindna kuwulm? ²³Yesus opla vremnana, kava moangakalamomba ishotava, wo os u, mani indkoklava vev. Wo heva os nom kava ishovpa tanamba, wo manara yimba kamba sang polavoi? ²⁴Wo doa Anasva venamba, Yesusmba wolaihangavna Kaiapasindam, sembayang andranindna kuwulindam. Yesusva mendah wena ningiwulvahmana vevna.

Pitava Henga Onam, Kava Tit Venav Yesusmba.

Matiu 26:71-75, Mak 14:69-72, Luk 22:58-62

²⁵Simon Pitava di lohvnamba, hevm suwepavna vrevna. Wo hev umnina, es hevpa yimba no mongo indhanarinita Yesustindirinita? Wo Pitava helwolnamba, wo hev unna, owai, kava hetindirinita lohvmoa. ²⁶Mongova sembayang andranindna kuwulna andranindriniva doara di lohvna. No andranindriniva henona owal, ten Pita angol singeitpingamnam. Wo he ophona, kava os nengv, kava doa yemba nonglasambaihai Yesusmongo oliv denwit osorava. ²⁷Henga Pita tonam, owaimomoa, wo doa henanam ayamba os ophona.

Doa Yesusmba Waiangavna Pailat Duangindamba.

Matiu 27:1-2 eva 27:11-14, Mak 15:1-5, Luk 23:1-5

²⁸Wo doa Yutanindna kuwulva umninamba Yesusmba Kaiapasna deuvriniva, os waiangana Rom duangna deuvramba. Mendah kuk vilihapihavna simolnonoam. Yutanindva nomba no Rom duangna pueilmeramba saivnamoa. Himba hevnapenam vivna, manara noinda himba Pasova tihinnem hlalm vevna. ²⁹Wo noinda Pailat duangva ambo amballamba phunna hembra. Wo hev unna, henamonana yimba hona indhanarinimba sahonamba waiambe? ³⁰Wo hev umnina, himba indhanarinikokla tetevul vrevna mindnam. Memba noinda kava waiambe hembra yeindamba.

³¹Wo Pailat unna Yutanindmba, waiangarava hemoa, yeoa pev ambo wetat u pevna lohohmona. Wo hev opulvona, heva os kanamba luhunvmoa, osmba mongomba indhanarinimba opulvolmba, helvakomandhalmba kruserava. ³²Honamba moamba wohlehvravna nom, ten Yesus doara ishonam, ona, os si kamba kruserava dahavav, si os wohvevav. Memba osm, Romnindva si os vivav, Yutanindva hevpa owai.

³³Wo hevpa henga os sihana hevna deuvmoramba. Wo hev Yesusm das ovrnamba, hev omnana, es hevpa yimba Yutanindna king kuwul luhunvma? ³⁴Yesus omnana, es hevpa temba yena pevna moama, indhana mongla yem koho ishumnimi kamomba yemba? ³⁵Pailat ophona, kava Yutanindriniva owai. Memba vei, yena pevna indhana, eva pevna sembayang andranindna kuwul, he yemba waiambei homba kaindamba. Mani yimba vena sahoklalva?

³⁶Yesus ophona, katindiva hona pethariniva owai. Himba hona pethariniva lovahtava, himba osva ata alhuta kanilmba, osva kamba ata holvorehunta moa Yutanindmba. Heva os katindiva snamba andrava vivmoa, osva hona pethanindva memba vivpa. ³⁷Wo Pailat omnana, wo yeta king kuwulva? Yesus ophona, temba yena pevna moamba. Kava memba osm lohv, ishomana vinilm indhanam moanonoam. Memba noinda kava prona hona petharamba. Wo indkumbiva himba nomba moanonoamba amnavpa, himba hilliv kamba.

³⁸Wo Pailat omnana, moanonoamba manam uv? Wo himba honamba osva sahmananamba Yesusmba, doa himba os engalphone henga Yutanindna kuwulmba. Hev unna, kava silelloh veni henamba sahoklamba, hembra nonamba waiisholmba. ³⁹Noinda kava osm ov, memba yena wevsava luhunv, osva kava wolaihaphunvav buinindrinim yemba hona Pasova tihrava. Yimba ningminivmi kamba, wolaihapholmba hona king kuwulmba Yutanindnamba?

⁴⁰Wo hev di dandwonam opelpanganam, owai, hembra owai, wolaihapho Barapasm. Barapasva himba daosnindrini yukov otol lohna.

19 ¹Wo doa Pailatva wohtvna, waiangalmba, helvelm wevdakanam. ²Wo doa valgonindva tivowosalva kuvunamba, weilvrvina king kuwulna topimsna. Wo himba os weilvholothunamba Yesusna kurava, wo kayen aembul vithimnina. ³Wo himba esvemava prowovna domba Yesusindamba, wo hev dasalm umnina, ei king kuwul Yutanindna. Pulvovna, di novlomossis vitavhue.

⁴Wo henga Pailatva phonamba amballam, hev unna Yutanindm, nunglu, kava waiphunv Yesusmba yemba men. Kava osm vev, yeoa wiyera ao, os kava nonglamnaimoa mana vemava sahoklalva, osm noina kava ata osva unvav, hemoa dahara krusera. ⁵Wo Yesusva pho, nomba tivombo weilvholothumninamba, nonahonam phona. Wo doa Pailat unna, nunglu men hona indhanariniva.

⁶Wo nonamba nomba sembayang andranindna mendeklina, polisinamba nunglivnamba Yesusmba, hev di opelpanganam vevandnam, lepetheiu pakona hemoa krusera. Lepetheiu pakona hemoa krusera. Wo heva os Pailat ophona, waiango hemoa, lepethalmoa kruseramoa yeoa pev ambo. Kava silelloh venei sahoklamba henamba, osm noina kava ata osva ovav, hemoa dahara.

⁷Wo Yutanind opulvona, kanamba doa luhunv lohohmomba, os hemoa dahara, manara noinda himba os oi, kava Sesoana ombol lohv. ⁸Nomba moamba snamba Pailatva hellevnamba, himba pemba os vevna i. ⁹Hev henga sihanamba meram, osahmana Yesusm, henamini hevpa yimba? Wo heva os Yesusva hembra opla vremenamoa owai.

¹⁰Wo Pailat omnana, manara yimba kamba opla vremenamba owai venav? Yimba nonora lohvma, osva manimani kaindangas lohv, yemba hengamba wolaihapholmba, lepethalmba yemba kruseramba? ¹¹Yesus opla vremenana, manimani memba yeindangasva lohvpa, kam kuvhoalm, Seso yemba hev vraohna. Indhanariniva nomba temba himba kamba holvoholothoiva yena englarava, henamba sahoklava mendekli lohv, henga yenamba kuvhoav.

¹²Pailatva honamba moamba osva hellenamba, wo himba doa monam silelvna, wolaihangalm hengam Yesusmba. Wo heva os Yutanind di vevandnam opelpanganam, himba nomba hevmba king kuwulalmba awollava, himba Sisana ungesundalm lohv. Yimba wolaihangatava no indhanariniva, yimba osva lohvavmoa Sisana sehelva, pivna mendekli king kuwulnamba. ¹³Pailatva hellena, ona, pai es Yutanindva eishov, wo doa waiphovna Yesusmba domba, temba osva ningthivnamba, Hon Memba Mongladatholm. Hiprumonamba os alvna, Gapata. Wo himba hevna ovavholla ovhoanamba, di hellevna wetatmomba Yesusnamba.

¹⁴Okombava hovrahovra lohvnamba, Pasovatihram innesowa noi kokolma vildavna. Pailatva unna Yutanindmba, men yenamba king kuwulva. ¹⁵Wo doa di Yutanind opelpanganam, wolaihingu, wolaihingu ehallam, lepetheiu krusera. Wo henga Pailat osihinnam, yimba kam ningminivma, helvakomandhalm yenam king kuwulmba kruserava? Sembayang andranindna kuwul opulvona, pinamba king kuwulva mongasal luhunv Sisaangas. ¹⁶Wo doa Pailatva os wohtna, holvorehunilmba Yesusmba valgonindmba, lepethalmba kruseramba.

Doa Yesusmba Kruserava Lepetheivna.

Matu 27:32-44, Mak 15:21-32, Luk 23:26-43

Doa valgonindva waiangavna Yesusmba, lepethalmba. ¹⁷Yesusva pungavna hevna kruseva hev dom nolhram, ten os ningthivnam, Mindna Kukel. Hiprumonamba os ningthivna, Golkota. ¹⁸Wo dita himba lepetheina Yesusmba kruserava. Wo osoa indhanarini samblam di lepetheiwulna, vena, mongnasis mongnasis, Yesusmba hovra.

¹⁹Wo Pailatva moapetava novol venamba, di sena krusera novol vepetha. Os novol velohvna,

MEMBA YESUSVA NASARETRINI, YUTANINDNA KING KUWUL.

²⁰Wo nomba moamba os novol velohvna Hiprumona, Romnindmona, Grikmona. Indkumbiva Yutanindva beswonam nonglakhov vrevna,

manara noinda di nolhrata, ten helvakomandhinata, murapeta kotara.
²¹Wo noinda sembayang andranindna kuwulva osva Pailatmba umnina, manam osva yimba novol vei, Yutanindna king kuwul. Os novol veta, hona indhanariniva os ona, ka king kuwulva luhunv Yutanindnamba.
²²Pailat ophona, memba kava osva novol veiva, ata os wohnovol velohvav.

²³Valgonindva Yesusmba lopo vipieinamba kruserava, himba kayenmba os pelvwol vinina. Wo venamba, himba os pepemowilvna, vena, mongo dembhawilvna, mongo dembhawilvna. Wo nomba valgonindva vena, mongo endombwolna, endombwolna. Wo hev vena, bayu tokol moanvreimmnina. Os nunglivnamba, mongal wohkuendlina, diphe venamba, dingoho mutengra. ²⁴Wo nomba valgonindva hevm eishovna, manam pimba popowol vivav eskandva eskandva, owai, pioa kat velohra, verava, ora henoi win vev, wo osva henoi hevmba moanvravav. Honinda temurava hona moana plalva wohvelokusethiv tombaimorava,

Himba kana pikianmba hevm among vena. Wo himba kat vivna,
 kana pikianmba moanvralmba. *Buk Song 22:18*

Hona wevsana valgonindva vina Yesusna pikiandava.

²⁵Wo vena, aval, avakondal, eva Maria, Klopasna ongal, wo Maria Maktala, himba di murapeta lovahvna Yesusna krusesingi. ²⁶Yesusva nongalna, vena, avalm eva hevtindirininim, nom hev ten und vevnam, ona, men elohv. Hev omnana hevna avalmba, ava, men yenamba ombpevpa. ²⁷Wo henga omnana hevtindirininim, men yenamba avapevpa. Wo nonamba no Yesustindirininiva Mariamba os waingana hevna deuvram.

Yesusva Ongopienvna.

Matiu 27:45-56, Mak 15:33-41, Luk 23:44-49

²⁸Doa venamba, Yesusva nengna, manam manam temba kamba vilimbminiva, doata, osm doaramini tombaimom wohengvna. Doa hev onam, kamba peha venav. ²⁹Doara di indtholohvna wainmba botelna peplavhona, wo doa valgonindva lembetasna kovovrinamba, wainda velthapuv ve. Wo venamba, ona, doa wainmba mera vetha, doa wandtanglara ningewulinamba, wo os yithasuv vena Yesusna mengrava. ³⁰Wo Yesusva nenamba, wo hev ona, doata, os kuva koavpemnavna, dahavna.

³¹Hona nambainamba doa manimani kokolma vildavna sapturam, wo mongnasiva vah iaevul okambamba mendeklika pulpulvovra. Wo nonamba Yutanindva os vivna, owaimomolva mongova mindva senamba tirava vendendvavmoa detiva hona sapturamba mendeklikumbiva. Wo doa himba sah ovralm angavna Pailatm, wohtelm, os no indhanamindna kemonglam tetai vewol vinilm, osm lilnam dalvra, wo os nihilva vindianga vevra.

³²Wo doa valgonindva puvulpronamba, no mimirininamsna tetai vewol vinivna, ten vendendvnam krusera mongnasis Yesusinda. Wo henga henona, ten mongnasis Yesusinda vendendvnam. ³³Wo heva os valgonindva Yesusindava ona pulvona, wo hev nunglina, doa doara dahai. Wo noinda himba kelva henamba tetai vewol vininamo. ³⁴Wo heva os mongo valgonindrini he englabonana di hilvho almangval. Wo tovolva di maim ona napom shueiva, nungi lelnam sovhosapena.

³⁵Himba nomba honamba memba nonglanamba, osva ona, os honakowa phov, he ishov temurava. Manam manam himba memba ishonamba, tanamolnam. Himba nonora loh, osva kava tanam ishov. Himba ishov, osm eva yeoa honamo kek vithivra. ³⁶Honamba manimani memba venamba, osm tombaimomba wohengvra,

Owaimomolva henamba kelva tuvhueinamo. *Buk Song 34:20*

³⁷Wo mongova tombaimomba os ona,

Himba si nom naengho vrvira, ten hev lunam bunena. *Sekaraia 12:10*

Yesusmindmba Honmera Vindithina.

Matiu 27:57-61, Mak 15:42-47, Luk 23:50-56

³⁸Wo doa venamba sismba, Yoseppa Arimatiariniva gavna, sahmanalm Pailatm, vendgualm Yesusmindm. Yoseppa Yesustindirini lohva, heva os himba hevmba komandhavna, noinda himba pem vinvna Yutanindnapenam. Pailat omnana, wouta. Wo Yoseppa vendvenamba, os vendguana Yesusmindmba. ³⁹Nikotemus pethamnana Yosepmba. Nikotemusva himba noi, ten hesna mi pronam sinim, nonglalm Yesusm. Himba sandava mindnam iprona, kinmba os vevna 30pelara kilo. Timba sambla no nenelna vewulna, vena merna, alosna.

⁴⁰Wo Yosepiva Nikotemusiva Yesusmindmba evendvenamba, wo no sandana engovhoa, wo kayen besalna eningena. Men hona wevsana, Yutanindva mindmba singvevna. ⁴¹No vuherava temba Yesusmba valgonindva lepetheinamba, diva lohva denwit doara. Wo no denwitmusra diva doara lohva honmeva, wo owai, doarava doava mongomba noindava singvinamo nemetva, khui mendah lohva. ⁴²Wo no mella himba di evindithana Yesusmindmba, manara noinda di ambo mumra lohva nomba honmeva, wo doa vah iaevul okambamba mumra vrvirna, loholm.

Honmeva Nis Lohvna, Yesusva Doara Phona.

Matiu 28:1-8, Mak 16:1-8, Luk 24:1-12

20 ¹Minguram Maria Maktalava gavna pokamaram, wo nonamba mendah kilvrilvna simba. Mariava nonglavna nom hon mendeklim, ona, pai doa honmba ahnam vileilv kewulva.

²Mariava dandwonam velavravna dom Simon Pitaindam, eva mongom Yesustindiranim, nom ten Yesus hev mindnam und vevnam. Maria unna, anmundvema doa vindvi mendeklimba pokamariniva? Kava tit viv, hi dihi vindlihei hembra?

³Wo vena, Pita eva he dandwonam evlarombtvna dom pokamaram.

⁴Dandwonam evlarombtvna, henoi koho, henoi koho, wo heva os owal Pitamba kuvhoana. Wo owal hesna phona miva diva pokamarava. ⁵Hev vithanamba, novvesiha ve pokamaramba. Nonglana, ona, owai, men kayenmba moanvilv, heva os owai, himba sihanamo domba meramba.

⁶Wo venamba, Simon Pita pronam. Hev sihanamba pokamaram, nonglana, ona, men kayenmba moanvilv.

⁷Hev vena, nom nonglana kayenm, ten Yesusna kum nona ningimninam. Nomba kayenmba mongawulmba moan evahilwolvnamo, pepetowol velohvna, wo indakonda moanvehalohvna. ⁸Wo eva henoi siha, ten hesna mi pronam. Himba nonglavna, ona, tanam doa Yesusva phoi. ⁹Himba mendah levra epievnamoa honamba temurava tombaimomba, osva Yesusva si phovav henga pokamariniva.

Yesusva Yumna Velana Maria Maktalam.

Matu 28:9-10, Mak 16:9-11

¹⁰Wo doa os henga himba engana deuvram. ¹¹Mariaoa di lohna ambara pokamara wena. Nonamba himba wivelohvpa, hev vithanamba, novvesiha ve pokamaram. ¹²Himba nongalna, ovsongolnindrini samblava, doa vewol evei kayenmba dombal. Di ahavna, ten nolhra Yesusmindm vindilnam, mongova kuis avna, mongova mutengsis avna. ¹³Hev ohosahmana, manara yimba wivev? Hev ophona, anmundvema kana mendeklim vindviva? Kava tit vev, hi dihi himba vindlihei hembra.

¹⁴Nonamba Mariava honamba osva ona ishona, himba henga ona imharavhoana, nonglana, men lohv Yesusva. Wo heva os himba osva nengnamoa, memba Yesus, owai. ¹⁵Yesus osahmana hem, omnana, manara yimba wivev? Wo anm yimba hevpa silelv memba? Mariava os nengvna, memba denwit andranindrini olohv. Wo hev omnana, wo es hevpa ye vendguaimea mendeklimindmba? Ishomno kam, hi yimba vendpikai hembra, wo ata kava vendvevav henga hembra.

¹⁶Yesus omnana, Maria, Mariava novlomossis imharavhoanamba Yesusindam, wo omnana Hiprumona, Raponi, osm uv, guru. ¹⁷Yesus omnana hembra, ata ye kam kevrvav. Kava mendah vongavmoa araindamba. Heva os gao, katindimoa ishunu honamo. Kava henga gav yena kavna araindam. Kava henga gav yena kavna Sesoaindam. ¹⁸Maria Maktalava ganamba, wo hev unna Yesustindim, kava nonglai doa mendeklimba. Wo eva hev vena, nom ishonna, ten Yesus hevnm ishomnanam.

Yesusva Ambara Vithinvna Hevmba Hevtindimba.

Matiu 28:16-20, Mak 16:14-18, Luk 24:36-49

¹⁹Ambo nonamta minguram, okombava vohavnamba, Yesustindiva mongawaduvra mongawatilm kusonamba, di aevulvna. Tuvpa kolvowol vinamba keknam, noinda himba pem vivna Yutanindnapenam. Wo doa Yesusva pronamba, hovrahovra di lohvhueinnamba. Hev unna, yeoa beswonam undwonam ao. ²⁰Henanam himba honamba osva unnamba, doa vena, engla nethawolna hevna, eva almangm. Wo hevtindiva indk vethappravna, nonamba himba nunglivnamba mendeklimba. ²¹Wo henga Yesus unna, yeoa beswonam undwonam ao. Ara kamba wolaihaprana, ka men eva yemba wolanga vungu vev. ²²Honamba himba osva ishopianamba, doa hevna vavatan povholothunnamba, unna, dumbu Sesoasongol. ²³Yimba selvhinvrava mongla indhanana indkoklamba, henamba os hoai vilunvra. Yimba selvhamba owai vinvra, osva henamba wohluhunvra.

Yesusva Hevm Holvonethamnana Tomasm.

²⁴Tomas, eva mongova nihilva Ditimus, himba owalmongova aevulvnamoa, nonamba Yesusva provnamba. Tomasva mongo noi 12pelara, ten lovahvnam Yesustindi. ²⁵Wo mongla owal hevtindi umnina Tomasmba, kava doa nungli mendeklimba. Wo eva os Tomas ona, kava nengvmoa, heva boasna pakovholm englarinim ka nonglamnarava kavna novna. Wo kava si hellevavmoa, heva verava, boasna ka kavna englapund piasaharava di pakovholla, eva di almangsis bunevholla.

²⁶Wo mongona minguramba hevtindiva henga devvra kusovna, wo Tomasmba di waiaevulvna nonamba nihra. Tuvpa doara kolvowol vina keknam, heva os Yesusva sihanamba, di hovrahovra lohvhueinnamba. Hev unna, yeoa beswonam undwonam ao. ²⁷Wo doa hev omnana Tomasm, lotho pevna englapund hui. Nonglo kana englam. Piasaho pevna engla hui kana al Mangshara. Wuleiho sambla undmoa, kamo keknam undnahonam lohvhooamno.

²⁸Tomas omnana, yimba kana mendekli, yimba kana Sesoa. ²⁹Wo Yesus omnana, yimba noinda ov, ambo yimba kam nonglaiva. Himba nomba temba nonglamba novnamba owai vivpa, wo keknamba lovahmanavrava kamba, si tanamolnamb indk vithivav.

Manaram Yonmba Moalamangnindriniva Novol Vena Hona Tombaiva?

³⁰Yesusva vewol vena mindnam monglava mendekliandrava hevtindina novrava, heva os novol velohvmoa hona tombairava. ³¹Wo heva os memba novol velohv, osm yimba nonora avra, osva Yesusva Kristus lohv, Sesoana ombol. Undnahonamb keknamb lovahthamnallava, yimba osva avav undna hena nihilla.

Yesusva Nongalphona 7pelara Hevtindimba.

21 ¹Hengava sismba Yesusva hevmba ambara vithinvna hevtindimba di Galiliplombra. Men nomba yunam os vina nonamba. ²Wo hevtindiva himba noi vivna, vena, Simon Pita, Tomas, Nataniel Keina kembellini Galili provinsrini, Sepetina ombolsambila, eva mongsambila henga. ³Simon Pita ophona, kava gav tambkova. Wo mongla owal unnam, kava ata yemba engambvav. Wo doa hev anganamba, botra vongopia. Wo nom sim svopinginam, venamba, owaimomolmba, mongova tambkova wevrinamo.

⁴Doa venamba, kuk vilihapihavnamba, Yesusva ambo di engalla timimsna hellevholohvna. Wo heva os hevtindiva osva liheivnamoa, temba Yesus loh, owai. ⁵Wo doa hev unna, seh, es hevpa yimba aiv owaimomolmba werombol vima tambkova? Hev opulvona, owainonoa. ⁶Wo hev henga unna, piapovo pevna pohlalawondaoa botna nihanasis, wo ata yimba os werombol vivav monglava tambkova. Wo himba vina os honamba. Wo himba esvemava owouspulva ishuvna tambkova, osva owai, es eva ata pohlalawondava wulimbta domba botramba henga.

⁷Nomba hevtindirininamba, nom ten Yesus hev mindnam und vevnam, himba os omnana Pitamba, memba mendekli. Nonamba Pitava hellevnamba, osva ona, os ov, wo himba nungi lelnam henga vethana hevna kayen tokolva. Pitava doara selvlahanam hevna kayenmba andraram. Wo himba os viliavhoanamba pomera, ganamba, mongnamilm pho. ⁸Owalva botra lovol vena mongnahalmba, kololasva wulangavna tambkowondava. Eva mani ehallama, mongnamilva ambo mara os men ten. ⁹Nonamba hevtindiva pihipiavnamba botriniva, wo kusovna di engalla, ona nunglina, suwemba men lon vev, wo no suwerava tambko peltavna, roti pilvna. ¹⁰Wo doa Yesus unna, iamb veo mongla tambko, noi ten pev dumbim.

¹¹Simon Pita botram sihanamba, tambkowondam dom waipiha engallam. Mendekliangas snal loihangavna i. Nomba tambkova os lohna 153pelara, eva mani eskandma owai, heva os pohlalawondava vitvita vepenamoa. ¹²Yesus unna, ambo, doa hlao. Hevtindiva pem viwul vevna, an eva ata sahmanata hembra, osva, an hevpa yimba? Liheivna, osva memba mendekli. ¹³Yesus pronamba, roti vranamba, daswulungu vevna. Wo osoa tambkova eva os vinnata. ¹⁴Memba doa Yesusva yehol vepiavna, ambara vithinilmba hevtindimba hevmba, nonamba sismba temba phonamba hengava pokamariniva.

Yesusva Ishomnavna Pitam.

¹⁵Nonamba himba innemba hlapianamba, doa Yesus omnana Simon Pitam, Simon, Yonna ombol, es hevpa yimba ambo mindnam und vevma

kamba? Wo yimba owapevmba kuvhoawol vev. Hev opla vremnana, eye, mendekli, yimba nonora, os kava yemba und vev.

Yesus omnana, kekalvho vrinvm kana sipsip otolm, inne dahwol vevm. ¹⁶Henga Yesus omnana, Simon, Yonna ombol, es hevpa yimba kamba und vevma? Hev opla vremnanam, eye, mendekli, yimba nonora, osva kava yemba und vev.

Yesus omnana, kekalvho vrinvm kana sipsipm, inne dahwol vevm. ¹⁷Wo henga Yesus tomnanam, Simon, Yonna ombol, es hevpa yimba kamba und vevma? Pitava lous vovhoana, manara noinda Yesus henga no mongawamona osahmananam, es hevpa yimba kamba und vevma? Pita omnana, mendekli, yimba manam manam nonorangas lohv. Yimba nonora, osva kava yemba und vev.

Hev omnana, kekalvho vrinvm kana sipsipm, inne dahwol vevm. ¹⁸Kava ishomnav yemba tanam. Yimba nonamba tendotowondva lohvnamba, yimba pevna banmba vethavnamba, wo nona lohmana vevna, domba yimba pevpa temba galmba vevnamba. Wo heva os yemba mundilva vevrava, yimba si pevna englava liowolvra, wo mongo yemba ningevra. Himba yemba dom si wailovahmana vevra, ye dom galm owai vevram. ¹⁹Yesusva olhmanavna honamba, osm ora, os si Pitamba dahavav, Sesoana nihilm okolalm. Wo henga Yesusva omnana Simonmba, pethamno kam.

²⁰Pitava haravhoanamba, nongla owallinim, nom Yesus hem ten mindnam und vevnam, ona, men sis kamba petheinv. No indhanarini he ten ku nithanam Yesusinda murapeta, doara nonam inne wonnevnam, wo onam os, mendekli, an yemba ata ungundmba holvonithinvav? ²¹Nonamba Pitava osva ona nonglana, men sis kam engalprav, hev omnanam Yesusm, mendekli, eva hona indhanarinimba, si es yimba venavav?

²²Yesus opla vremnana, kava osva nengtava, himba si yunalm wohavav, verava, henga kav provram, mani memba eva yena mana vemama, a? Yeoa ambo kam pethamno. ²³Wo doa moamba henamba owalindava siheingu vinvna, os, hona indhanarinimba si dahavavmoa. Wo heva os owai, Yesusva osmba onamoa, hembra si dahavavmoa. Himba ambo os ona, kava undva vretava, osva himba si avav, os verava, kav provram henga, honamba eva mani yena mana vemama, a?

²⁴Nomba hevtindiriniva noita men ishovm hona moam. Himba noi men hona moam novol vevol venam. Pivva nonora, osva manam manam himba temba ishonamba, tanam. ²⁵Lohv esvema nomba manimani, memba Yesusva venamba. Wo nomba manimani temurava tombairava novol vetava, kava os nengv, huiva hona pethava eva mani mendeklima, tombaimba nomba lehra vethalmba, temba novol vevol vivavpa. Doata Yonna Yesusmoa.